

MATAUPU VASEGA AMATA 2019

MANATU AOA O IESU E, A'OA'O I MATOU IA POPOTO I OU ALA

MANATUA TAIALA O IANUARI MA FEPUARI: O LE LALOLAGI I LE AMATAGA

Ua filifilia lenei manatu taiala e ta'imua ai mataupu o le Vasega Amata i lenei tausaga, ona o loo fa'aaoga pea tala mai i le Tusi Paia i faasologa o mataupu a lenei vasega. O le faavae lea o le ola tuputupu a'e o fanau laiti a le Ekalesia, ia malamalama i le foafoaga na faia e le Atua i le amataga.

**ASO SA: 27 IANUARI 2019
(ASO SA TUPULAGA)**

MATAUPU: NA FAIA E LE ATUA LE MALAMALAMA

SINI: Ia a'oa'o le vasega ia malamalama, o le Atua na faia le malamalama.

TUSI FAITAU: Kenese 1:1-5 (mo le faiaoga)
Kenese 1:3 (mo le vasega)

“Ua fetalai mai le Atua, Ia malamalama; ona malamalama ai lea.”

FESOASOANI MO FAIAOGA:

A o le'i faia le lalolagi ma mea uma ua tumu ai, sa i ai le Atua. O le Atua foi na Ia foafoaina mea uma ua faia. O le lalolagi sa leai se mea na i ai. Sa soona nunumi ma ufitia uma le moana i le pouliuli, o lea na faia ai e le Atua le lalolagi i lona matagofie ua i ai nei.

Na ona fetalai atu lava o le Atua ia malamalama, ona malamalama uma ai lea o le lalolagi. Ua silasila atu le Atua i le malamalama, ua lelei. Ona tu'u eseese ai lea e le Atua o le malamalama mai i le pouliuli.

Ua faaigoa e le Atua le malamalama, o le ao, a o le pouliuli, o le po. Na faia e le Atua le malamalama i le aso muamua na faia ai e le Atua le lalolagi.

GALUEGA FAATINO:

1. Ia saunia se atigipusa, molī uila. Ia fai se faamalama po o se faitotoa o le atigipusa, e ki atu i ai le molī uila i totonu e faamalalama ai le atigipusa.
2. Ia faamalalama i le vasega, o le atigipusa pogisa o le lalolagi lenā, ona ki lea o le molī uila i totonu ma faamalalama ai, o le ao po o le malamalama lena na faia e le Atua e faamalalama ai le lalolagi atoa.

Valivaliga Ata: Ia fai ni kopi o ata ua saunia e tufa mo le vasega e galulue ai.


PESE:

This little light of mine

A'OA'OGA:

1. Na faia e le Atua le malamalama
2. Ia tatou faafetai i le Atua mo le malamalama po o le ao.

ATA: NA FAIA E LE ATUA LE MALAMALAMA



Tatalo: Faafetai tele le Atua i le malamalama na e faia mo i matou. Amene.

ASO SA: 3 FEPUARI 2019

MATAUPU: O LE ELEELE MATŪTŪ

SINI: Ia a’oa’o le vasega ia malamalama, na faia e le Atua le eleele, e aogā mo tatou uma.

TUSI FAITAU: Kenese 1:9-10 (mo le faiaoga)
Kenese 1: 9-10a (mo le vasega)

“Ua fetalai mai foi le Atua, “Ia potopoto i le mea e tasi vai i lalo o le lagi, ia iloa foi le eleele matūtū; i le ua faapea lava. Ua faaigoa e le Atua le eleele matūtū, o le eleele.”

FESOASOANI MO FAIAOGA:

O le eleele, o le tasi lea o mea o le foafoaga na faia e le Atua, e aogā mo i tatou uma. Na fetalai le Atua, ia potopoto uma vai i lalo o le lagi i le mea e tasi, ina ia iloa atu le eleele matūtū. Ua faaigoa foi e le Atua le eleele matūtū, o le eleele, a ua faaigoa le faapotopotoga o vai, o le sami. Na faia e le Atua le eleele i lona tolu o aso na faia ai e Ia le lalolagi.

O nisi nei o aogā o le eleele mo i tatou. Ua mafai ona tutū ai fale e nonofo ai, o auala e feoa’i ai taavale e faimalaga ai i soo se itu o le atunuu, e totō ma ola mai ai ituaiga laau eseese e pei o laau e fua mai ma maua ai meaai mo tatou uma. Ae le gata i lea, o laau e fua mananaia e faamatagofie ai le lalolagi uma.

Tamaiti, ia tatou lagona le loto faafetai i le Atua, auā na Ia faia le eleele mo tatou uma. E tatau foi ia i tatou ona tausii faalelei le eleele, e ala i le to’aaga e ao le otaota ma vele ese vao o lo o faamatagāina ai le eleele.

GALUEGA FAATINO:

Fesili ma Tali

1. O ai na faia le eleele matūtū?
Tali: O le Atua
2. O lona fia o aso na faia ai e le Atua le eleele matūtū?
Tali: O lona tolu o aso.
3. Aisea na faia ai e le Atua le eleele matūtū?
Tali: Auā e aoga mo tatou uma ma le lalolagi atoa.

PESE: He made the whole world.

He made the whole world
In His hands he made the whole wide world
With His hands He made the whole world
In His hands He made the whole world with His hands

Na faia e le Atua
Le lalolagi atoa i ona lima
I ona lima na Ia faia le lalolagi
I ona lima na Ia faia le lalolagi atoa

A'OA'OGA:

1. O le Atua na faia le eleele.
2. E lelei le eleele e aogā mo lo tatou ola.
3. Ia tausi faalelei o tatou eleele.

TATALO: Faafetai le Atua i le eleele na e faia mo i matou. Amene

ATA: ELEELE MATŪTŪ



ASO SA: 10 FEPUARI 2019

MATAUPU: O MANU FELELEI

SINI: Ia a'oa'o le vasega ia malamalama, na faia e le Atua manu felelei, e aogā mo tatou uma.

TUSI FAITAU: Kenese 1:20-23 (mo le faiaoga)
Kenese 1:20 (mo le vasega)

“Ua fetalai mai foi le Atua, “Ia tele ona tutupu mai i le sami o mea ola e fetolofi, ia lele foi le manu lele i luga o le laueleele i le vanimonimo o le lagi.”

FESOASOANI MO FAIAOGA:

O lo o tāua i le tatou tusi faitau, o le Atua lava na faia manu felelei, ma e tofu lava le manu ma lona aogā. O nisi manu felelei, latou te aai i fua o laau aina, ma fuga o laau, ma faasalalau solo o latou fatu, ma toe tutupu mai ai isi laau fou, e pei o le segavao, iao, lulu, aeto ma isi. Ae le gata foi i lea, latou te aai i manu laiti po o iniseti o loo faaleagaina faatoaga ma le tele o isi laau aogā.

O nisi o manu felelei, latou te aai i i'a o le sami, e pei o gogosina, tava'e sina, toloa ma isi. A o'o ina faapepepe manu nei i se ogāsami, ona iloa ai lea e le au-faifaiva po o le au-fagogota, ua tele se `au i'a i lea ogasami. O nisi manu felelei, e aogā tatou te aai ai, e pei o lupe ma pe'a. E fiafia tele o tatou mātua pe a faasupo le lupe, ae tunu le pe'a. E ese le manogi i le tausami a tagata matutua.

Tamaiti, o le mea lea e tatau ai ona tatou fiafia ma faafetai i le Atua, i le ola o manu felelei na Ia faia mo i tatou ma le lalolagi atoa.

GALUEGA FAATINO:

Ia saunia e lau susuga ni pepa malo (cardboards) e tusi ai foliga o manu felelei esee ma valivali ma fai ni manoa e nonoa ai i ulu o tamaiti.

PESE: A'au, 'a'au si i'a laititi

A'OA'OGA:

1. Na faia e le Atua manu felelei
2. Ia tatou fiafia i le ola o manu felelei, aua e aoga mo i tatou

TATALO:

Faafetai Tamā mo manu felelei na e faia, e aogā mo i matou ma le siosiomaga. AMENE.

ATA: O MANU FELELEI

Illustrated by Ken McCardell
For BibleRhymes' Creation
www.BibleRhymes.com
[facebook.com/BibleRhymes](https://www.facebook.com/BibleRhymes)



ASO SA: 17 FEPUARI 2019

MATAUPU: O LE FANAU A NOA

SINI: Ia a'oa'o le vasega ia malamalama, o le fanau a Noa na ainā ai le lalolagi uma.

TUSI FAITA: Kenese 9:18-29 (mo le faiaoga)
Kenese 9:18-19 (mo le vasega)

“O atalii foi nei o Noa e na ulufafo i le vaa, o Semu ma Hamo, ma Iafeta, o Hamo foi o le tamā ia o Kanana. O atalii nei e toatolu o Noa; o i latou foi na ainā solo ai le lalolagi uma.”

FESOASOANI MO FAIAOGA:

Ia fai ni fesili faigofie e tatai ai mafaufau o le vasega i le mataupu ao le'i faamatalaina.

Fesili:

1. O ai foi na fau le vaa? Tali: Ioe, o Noa.
2. E fia tausaga na fau ai e Noa le vaa? Tali: E 120
3. E toa fia tagata na o i le vaa? Tali: E toa 8.
4. O ai la nei tagata? Tali: O Noa ma lona toalua, o lana fanau ma o latou toalua.
5. E toa fia le fanau a Noa? E toa tolu.

Ia toe faailoa le mataupu i le vasega.

O Noa e toatolu ona atalii. O i latou nei, o Semu, o Hamo ma Iafeta. O i latou foi nei na faataapeape ma salalau solo i itu uma o le lalolagi.

O atalii o Iafeta, sa salalau solo i nuu tu matafaga. O nuu ua tu lata i le sami Metiterani i Asia ma Europa, ona gasolo lea i le itu i matū o Europa, o lo o i ai Siamani, Rusia, Eleni ma isi. Ua taua i latou o tagata sisina po o tagata papa'e.

O atalii o Hamo, na gasolo i le itu i Saute. Ua nonofo i nuu o Aferika, Initia ma Arapi. Sa salalau foi isi i nuu o Kanana, Filisitia ma Aikupito, ua taua i latou o tagata uli.

O atalii o Semu, na tutupu ai nuu eseese o Asia, aemaise o tagata Isaraelu, ma Iesu Keriso le Mesia. O tagata eena i latou, e pei o tatou i Samoa ma nisi o atunuu o le Pasefika.

GALUEGA FAATINO:

1. Valivaliga Ata: Fai ni kopi o le ata e tufa i le vasega e galulue ai.
2. Ia saunia ni faafanua se tolu:
Faafanua o nofoaga na aumau ai tagata papae.
Faafanua o nofoaga e aumau ai tagata eena.
Faafanua o nofoaga e aumau ai tagata uli.
Ia fa'aali faafanua a o faamatala le Mataupu.

PESE: Iesu alofa i tamaiti / Jesus loves the little children

A'OA'OGA:

1. O le fanau a Noa o Semu, Hamo ma Iafeta.
2. O le fanau a Noa na tupuga mai ai tagata eseese o le lalolagi.

TATALO:

Faafetai le Atua i lou a'oa'o mai ia i matou i lenei aso, o le fanau a Noa na tupuga mai ai tagata lanu eseese o lenei lalolagi. Amene.

ATA: O LE FANAU A NOA



ASO SA: **24 FEPUARI 2019**

MATAUPU: **O LE PA O IERIKO**

SINI: Ia a'oa'o le vasega ia malamalama, o le mana o le Atua na solo ai i lalo le pa o Ieriko.

TUSI FAITAU: Iosua 6:1-5 (mo le faiaoga)
Iosua 6:5 (mo le vasega)

“A faalevaleva ona ili o le pu o le iupeli, pe a outou faalogo i le leo o le pu, ona alalaga lea o le nuu uma ma le leo tele; ona solo ai lea i lalo o le pa o le aai; ona o ai lea o le nuu uma taitasi i o latou luma.”

FESOASOANI MO FAIAOGA:

O le nuu lenei o Ieriko, e tu latalata i le vaitafe o Ioritana. E si'o uma lenei nuu e le olo, o le aupa maualuga ua ati i maa ma simā. E faigata lava ona sao ai se tagata i totonu.

Na fesoasoani le Atua i le taita'i o Isaraelu, o Iosua, i le auala latou te maua ai ma faatoilalo le nuu o Ieriko. Na faatonu e le Atua Iosua, ina ia latou faataamilo i le aai, o 'au uma o le taua, ia tasi le faataamilosaga o le aai i le aso e tasi. Ia faapea ona fai i aso e ono.

Ia ave foi e faitaulaga e toafitu o pu e fitu i luma o le atolaau. O le aso fitu latou te faataamilo faafitu ai i le aai, e ilia foi pu e le aufaitaulaga. A faalevaleva ona ilia pu i le aso fitu, ona alalaga lea o le nuu uma ma le leo tetele, ona solo ai lea i lalo o le pa o le aai.

Na usitai Iosua ma latou faia lenei mea ma le faatuatua i le Atua, ona solo fua lea o le aupa i lalo i le mana o le Atua.

GALUEGA FAATINO:

1. Valivaliga Ata: Ia fai ni kopi o le ata e tufa i le vasega e galulue ai.
2. Ia fa'aaoga le faafanua o lo o i tua o le Tusi Paia e fa'aali i le vasega o loo i ai Ieriko.
3. Ia saunia ni poloka laupapa pe uga foi, e fa'aaoga e le vasega e fau ai le `olo.
4. Faatino e le vasega le vaega o le tala ua ili ai pu ma solo ai i lalo le pa.
 - Ia fa'aaoga ni pepa tāai ma tufa i le vasega.
 - Faaaoga le laulau a le faiaoga e fau ai le pa i poloka, ona faataamilo faa ono lea o le vasega. Toe taamilo mulimuli ma ili loa pu pepa e tamaiti ma sauni le faiaoga e faamalepe i lalo le pa.

Pese: Solo i lalo x2 (pa o Ieriko x3)

A'OA'OGA:

1. E fesoasoani le Atua ia i tatou i taimi uma.
2. O Iosua le taitai usitai i le Atua.
3. Talitonu ma faatuatua i le Atua e manuia ai.

TATALO:

Le Atua e, faafetai ua e a'oa'o mai ia i matou ina ia matou talitonu i le Atua e manuia ai.
Amene.

ATA: O LE PA O IERIKO



MANATU TAIALA O MATI:

O GALUEGA LELEI

O le manatu taiala e pei ona tā'ua, e a'oa'oina ai le fanau i lenei masina, o lo o atagia ai galuega lelei na faatino e lo tatou Alii Faaola o Iesu a o i ai i le lalolagi. E le gata o galuega faamalolo, o vavega, aemaise o le ola a'oa'oina i amioga e tatau ina ia tatou sao atu i le malo e faavavau.

ASO SA: 3 MATI 2019

MATAUPU: O TAGATA NA FAU O LA FALE

SINI: Ia a'oa'o le vasega ia malamalama i le tala i fale sa fauina i luga o le papa ma le oneone.

TUSI FAITAU: Mataio 7:24-27 (mo le faiaoga)
Mataio 7:25 (mo le vasega)

“Ona to mai lea o uaga, ua oo mai foi tafega, ua agi mai foi o matagi, ua pesi mai i le fale, ae le'i pa'ū lava ia; auā ua faavaeina i luga o le papa.”

FESOASOANI MO FAIAOGA:

I le feagai ai o Iesu ma lana galuega lelei i le lalolagi, sa tele lava taimi sa ia fa'aaogaina ai faataoto po o tala faatusa e i ai o latou uiga tāua, e a'oa'o atu ai i le toatele o tagata ina ia faigofie ona latou malamalama ai. O le tasi lenei o faataoto a Iesu.

Faamatalaga o le Mataupu

Sa i ai se tagata sa fau lona fale i luga o le papa. Ua matuā malosi lava le fale, auā o loo lelei ma malosi le papa o lo o faatū ai po o faavae ai le fale. O lona uiga, a malosi le faavae, e faapena foi ona malosi le fale. Ua to mai nei timuga tetele, ma ua oo mai foi tafega, ma agi malosi mai le matagi. Ona o le malosi o le papa o lo o tu pe faavae ai le fale, e lei pa'ū ai i lalo. Ua faatusa e Iesu le tagata na fau lona fale i luga o le papa, o le tagata poto.

O le tasi tagata na fau lona fale i luga o le oneone. O le oneone, e lē aogā ona faavae ai se fale auā e le tumau, ae solo gofie. Ona to mai lea o timuga, ua oo mai foi tafega, ua agi malosi mai foi le matagi. Ua pa'ū i lalo le fale lea, auā e le mautū le faavae i luga o le oneone.

O le a'oa'oga a Iesu i lenei tala, o se tasi e faalogo ma usitai, o le tagata poto lenā. A o se tasi e faalogo ae le usitai, o le tagata valea lena.

Tamaiti, o le finagalo o Iesu, ia avea i tatou e fai ma tagata popoto, e ala i le tatou faalogo ma usiusitai, ma faia lona finagalo i aso uma, e manuia ma sologa lelei ai tatou uma.

GALUEGA FAATINO:

1. Ia saunia e lau susuga i le faiaoga mea nei mo le faatinoga.
 - 2 apa fafano lapopoa
 - 8 fasi laau uumi
 - 2 plastic container aisa kulimi (empty)
 - 1 pakete vai lapoa
 - Maamaa poo iliili
 - Oneone
2. Fa'aaoga apa fafano e tuu ai maamaa po o iliili i le isi, ae oneone le tasi.
3. Ia tofu apa nei e lua ma fasi laau tai fa e fai ma pou o fale.
4. Ia fa'aaoga container aisa kulimi e fai ma taualuga o fale nei e lua.
5. Ia fa'aaoga le pakete vai e asu i luga o fale e lua i le taimi e to mai ai timuga ma oo mai tafega.
6. Ia fa'aaoga lenei tapenaga atoa i le taimi e faamatala ai le mataupu.

PESE: The wise man built his house upon the rock x3
And the rain came tumbling down

The rain came down and the flood goes up x3
And the house on the rock stood still

The foolish man built his house upon the sand x3
And the rain came tumbling down.

The rain came down and the flood goes up x3
And the house on the sand fell down

So build your house on the Lord Jesus Christ x3
And the blessings will come down

Blessings come down as your prayers go up x3
So build your house on the Lord

Tagata poto na fau lona fale i luga o le papa.

A'OA'OGA:

1. Ia tatou faalogo ma usitai i le Atua.
2. Faavae o tatou olaga ia Iesu Keriso.
3. Avea i tatou ma tagata popoto mo le Alii.

TATALO: Ia saunia pea e lau susuga i le faiaoga se tatalo e faauma ai le mataupu.

ATA: O TAGATA NA FAU O LA FALE



ASO SA: **10 MATI 2019**

MATAUPU: **UA A’OA’I E IESU LE MAUOA**

SINI: Ia a’oa’o le vasega ia malamalama, na a’oa’i e Iesu le tagata mauoa.

TUSI FAITAU: Mareko 10:17-24 (mo le faiaoga)
Mareko 10:23 (mo le vasega)

“Ona silasila solo lea o Iesu, ua fai atu i ona soo, e matua faigata ona sao atu o le mauoa i le malo o le Atua.”

FESOASOANI MO FAIAOGA:

A o malii ane Iesu i le ala, ona momo’e ane lea o le tasi taule’ale’a, ma tootuli i ona luma ma fai atu ia te ia, pe se a se mea na te faia ina ia maua ai le ola faavavau. Ona fesili lea o Iesu i le taule’ale’a, po ua na iloa uma tulafono. Ona tali ane lea o le taule’ale’a na usitai i ai talu ona tamaititi. Ua silasila atu Iesu i le taule’ale’a, ona alofa lea i ai, ma fai atu ia te ia, e tasi le mea e le o ia te ia, a ia alu ma faatau atu mea uma ua ia te ia, ma avatu i e matitiva, ona ia maua lea o le ola e faavavau.

Ua faanoanoa le taule’ale’a i upu a Iesu, ona ia alu ese lea, auā o ia o le tagata mauoa.

Tamaiti, ua ala ona alu ese le mauoa, ona ua le fia faalogo pe usitai i le faatonuga a Iesu, auā ua le fia alu e ave uma ana mea ma tagata matitiva ma ē ua fia maua le fesoasoani. O le mea lea e tatau ai ona tatou alolofa i tagata matitiva ma faasoa atu i ai mea ua tatou maua, e faamanuia mai ai le Atua ia i tatou.

GALUEGA FAATINO:

1. Valivaliga Ata: Ia fai ni kopi o le ata e tufa i le vasega e galulue ai.

PESE:

Alofa o se mea e te faasoa atu / Love is something that you give it away.

A’OA’OGA:

1. Ia tatou alolofa i isi tagata.
2. A tele ni au mea, faasoa atu mo e matitiva.

TATALO: Faafetai le Atua i lou a’oa’o mai i lenei aso, ina ia matou alolofa ma faasoa atu i tagata matitiva.

ATA: UA AOA'I E IESU LE MAUOA



ASO SA: 17 MATI 2019

MATAUPU: UA TOE OLA MAI LASALO

SINI: Ia a’oa’o le vasega ia malamalama, na faaola e Iesu Lasalo nai i le oti.

TUSI FAITAU: Ioane 11:17-44 (mo le faiaoga)
Ioane 11:43 (mo le vasega)

*“Ua ia fetalai atu ia upu, ona alaga lea o ia ua leotele,
“Lasalo e, ina sau ia i fafo.”*

FESOASOANI MO FAIAOGA:

Sa i le aai i Petania le tagata e igoa ia Lasalo, ma ona tuafafine o Maria ma Mareta. O lenei aiga sa alofagia e Iesu. Ua oo i le tasi aso, ua oo atu le tala ia Iesu o loo ma’i tigaila lana uo o Lasalo. Na faatalitali pea Iesu i ni nai aso, ona ia fai atu lea i ona soo, “o loo moe la tatou uo o Lasalo, ae ou te toe alu e fafagu ia te ia.

E taunuu atu Iesu i Petania, ua fa (4) aso talu ona i ai Lasalo i le tuugamau. Ua lagona e Ia le alofa tele ia Maria ma Mareta ma le latou aiga, o lea na ia alu atu ai i le tuugamau, ma faatonu nisi o tagata ina ia aveese le maa nai le gutu o le tuugamau. Ona tatalo ai lea o Iesu i le Atua. Ina ua mavae lana tatalo, ona ia alaga leotele ai lea, “Lasalo e, ina sau ia i fafo.” Ona sau ai lea i fafo o Lasalo mai i le tuugamau, ua fusifusia ona vae ma ona lima, ua fusi foi ona mata i le solosolo. Ona fetalai atu lea o Iesu ia te i latou, “tatala ia ia te ia, ina tuu atu ia e alu.”

Tamaiti, ese le ofoofogia o mea na faia e Iesu. E le gata ina faamalolo e Iesu le tele o mai, a ua ia mafai foi ona faaola le tagata na oti e pei o Lasalo.

GALUEGA FAATINO:

Valivaliga Ata: Fai ni kopi o ata ua saunia e galulue ai le vasega.\

PESE: Le alofa o le Atua e ofoofogia.

A’OA’OGA:

1. Ua faaola e Iesu Lasalo nai le oti.
2. E alofa Iesu i lana uo o Lasalo.

TATALO:

Faafetai Iesu i lou a’oa’o mai ia te i matou i lenei aso, aua o oe lava o le Faaola o tagata uma.
AMENE.

ATA: UA TOE OLA MAI LASALO



ASO SA: **24 MATI 2019**

MATAUPU: **UA PA'I ATU IESU I LE TINĀ MA'I VEVELA**

SINI: Ia a'oa'o le vasega ia malamalama, na pa'i atu Iesu i le lima o le tina ma'i vevela, ma malolo ai.

TUSI FAITAU: Mataio 8:14-15 (mo le faiaoga)
Mataio 8:15 (mo le vasega)

“Ua pa'i atu o ia i le lima o le fafine, ona te'a lava lea o le ma'i vevela ia te ia; ona tulai lea o ia, ua auauna ia te ia.”

FESOASOANI MO FAIAOGA:

A o feagai Iesu ma lana galuega faaola i le faamalolo o tagata mamai i le nuu o Kapanaumi, ona ia ulufale atu lea i le fale o se tasi o ona soo, o Peteru lona igoa.

Ua ulufale atu Iesu, ona iloa ai lea e ia le tina o le toalua o Peteru, o loo taoto i le ma'i vevela. Sa le'i faatali Iesu ae na ona ia pa'i atu lava i le lima o le fafine, ona te'a ai lea o le ma'i vevela sa ia te ia.

Ona tulai lea o le fafine ua maua lona malosi, ma auauna atu ia Iesu e pei o le tapenaina o meaai ma vaiinu mo Iesu ma ona soo sa faatasi ma ia i lena aso. Ioe tamaiti, e ese le ofoofogia o mea e faia e Iesu. O le pa'i atu o lona lima, na faamaloloina ai le ma'i vevela o lenei tinā.

GALUEGA FAATINO:

Valivaliga Ata: Ia fai ni kopi o le ata ua saunia e tufa i le vasega e galulue ai.

PESE:

Beautiful, beautiful, Jesus is Beautiful
And Jesus makes beautiful things of my life
Care for me, touching me, causing my eyes to see
And Jesus makes beautiful things of my life

Matagofie, Lalelei, O Iesu e lalelei
Ua ia faia o mea sili mo ita nei
Pai mai lou matai, tosina ai lau vaai
Ua ia faia o mea sili mo ita nei.

A'OA'OGA:

1. Na faamalolo e Iesu le tina ma'i vevela.
2. E ofoofogia mea e faia e Iesu mo i tatou.

TATALO:

Faafetai Iesu i lou a'oa'o mai ia i matou, i le tele o lou alofa ma le ofoofogia o mea e te faia mo i matou. AMENE.

ATA: UA PA'I ATU IESU I LE TINA MA'I VEVELA



MANATUA TAIALA O APERILA: O LAAU MA O LATOU AOGĀ

Ua filifilia nisi o laau e autu i ai mataupu o lenei masina ina ia a’oa’oina ai le fanau i lo latou tāua ma le aogā.

ASO SA: 7 APERILA 2019

MATAUPU: O LE OLIVE

SINI: Ia a’oa’oina le vasega ina ia iloa le laau o le olive ma ona aogā.

TUSI FAITAU: Kenese 8:1-11 (mo le faiaoga)
Kenese 8:11 (mo le vasega)

“Ua toe foi mai ia te ia le lupe i le afiafi, faauta foi oi lona gutu le lau olive mata, ona iloa ai lea e Noa ua papau le vai i le lalolagi.”

FESOASOANI MO FAIAOGA:

(Talatalanoa ma le vasega i le tala ia Noa ma le lolo). Ina ua atoa aso e fagafulu ona tatala lea e Noa o le faamalama o le vaa na ia faia ma faalele atu le manu o le oreva, sei iloa ai po’o ua papa’u le vai i le fogaeleele. Peitai e le toe fo’i mai le oreva ona e lē maua se mea e tu ai ona vae. Ona tuuina atu lea e Noa le lupe ma sa faapena foi ona lē maua e ia se mea e mapu i ai ma ua toe foi mai.

Ua toe tuuina atu e Noa le lupe ina ua mavae aso e fitu ma ua toe fo’i mai ma le lau olive mata i lona gutu, ona iloa ai lea e Noa, ua papau le vai i le lalolagi.

O le olive o le laau lea e tele i le nuu lea o Palesitina, e tele lona aogā e maua ai tupe. O le laau e tai foliga i le laau lea o le togo lona tuputupu a’e, ae tupu lava ma avea o se laau tele. O le fua o le olive e maua ai le suauu e faamū ai lamepa (Esoto 27:20). Sa fai ai le uu paia sa fa’au’u ai e Mose le atolaau a le Atua. O ona lālā sa fai ai fale apitaga. O le laau o le olive e tāua, ona e tele ina faaogaina atoa lea laau.

Tamaiti ia pei i tatou o le laau lea o le olive, o se laau aogā, aemaise le lau olive lea e i ai i le tusi faitau o le mataupu.

Mo le faiaoga: 1. Ia faitau le Tusi Faitau o le mataupu ua saunia mo le vasega. 2. Ia fai ni fesili e tuliloa poo malamalama le vasega.

- a. O le a le laau sa tāua i le Mataupu? Tali: Olive
- e. O le a se mea na fo’i mai ma le lupe ia Noa i lona alu faalua? Tali: O le laau olive mata.
- i. O le a se mea ua tatou maua mai i le fua o le olive? Tali: O le u’u manogi.

GALUEGA FAATINO:

Valivaliga Ata: Fai ni kopi o ata ua saunia e galulue ai tamaiti pe toe tusi e lau susuga le ata i se pepa lapoa e galulue ai le vasega atoa pe a le maua se masini fai kopi.

PESE:

O LE OLIVE – *fati:* (*O au o se tipoti pu'upu'u*)

1. O a'u o le olive o se laau
E aoga tele i le atulaulau
O lo'u tino lea, ma o'u lalā
E fau ai fale ma apitaga
2. O fua matagofie ma manaia
E maua ai u'u ua manogi nauā
E fa'au'u ai tupu o nuu uma
E faapea foi ma mea e paia

A'OA'OGA:

1. Ia pei i tatou o le laau o le olive e tele ona aogā.
2. Ia tatou aogā i soo se tagata aemaise le Atua
3. O le olive o se laau aoga tele.

TATALO:

Ia saunia e lau susuga i le faiaoga se tatalo e fauma ai le mataupu.

ATA: LAAU O LE OLIVE



www.shutterstock.com · 790512268



ASO SA: 14 APERILA 2019

MATAUPU: O LE PAMA (ASO SA LAUPAMA)

SINI: Ia a’oa’oina le vasega ina ia latou iloa le laau o le pama ma ona aogā.

TUSI FAITAU: Ioane 12:12-15 (mo le faiaoga)
Ioane 12:13 (mo le vasega)

“Ona ave lea e i latou o lau o pama ma o mai e faafetaiai ia te ia, ona latou alalaga lea, “Osana! Ia manuia lē afio mai i le suafa o le Alii, o le Tupu o Isaraelu!”

FESOASOANI MO FAIAOGA:

Ua faalogo le motu o tagata o le a malaga atu Iesu i Ieruselema ona latou ave lea o lau o pama, ua fola ai le auala ma o atu e faafetaiai ia te ia. E toatele foi na fofola o latou ofu ma lau o laau. Ua malaga atu Iesu o loo tietie i le tamai asini, ona latou alalaga lea, Osana! Ia manuia le afio mai i le suafa o le Alii, o le Tupu o Isaraelu!

O le Pama sa tupu tele ma lauolaola i Iutaia lea na fa’aaoga e fola ai le ala ina ua malaga atu Iesu i Ieruselema, auā o le laupama sa fai ma faailoga o le afio mai o se tagata maualuga e pei o se tupu. Sa teuteu ai foi pou o le malumalu o le Atua (1Tupu 6:32) lea na faia e Solomona i le pama. O lau foi o pama sa ato ai fale apitaga.

Sa fai foi laupama ma faailoga o le manumalo i le taua. Sa fai le laau o le pama ma faatusa o le tagata o le Atua. “E tupu olaola le tagata amiotonu e pei o le pama.” (Salamo 92:12)

Tamaiti manaia le laau o le pama, e tele ona aogā, ia e a’oa’o mai foi ia i tatou, ia tatou aogā i ō tatou matua ma soo se tasi lava e manaomia la tatou fesoasoani.

Fesili e Tuliloa ai le Mataupu:

- a. O le ā le igoa o le laau na tāua i le tala? Tali: O le Pama
- e. O fea sa tupu tele ai le laau? Tali: O Iutaia
- i. O le ā le aso lea e omai ai tatou ma laupama i le falesa? Tali: Aso Sa o le LAUPAMA.
- o. O le ā le mea na tupu i lea Aso Sa? Tali: O le malaga Faa-Tupu a Iesu.

GALUEGA FAATINO:

1. Valivaliga Ata: Ia fai ni kopi o ata ua saunia e tufa i le vasega e galulue ai.

PESE:

Osana Pepese Tamaiti uma x3

Osana Pepese Tamaiti uma

Ua afio mai le Tupu

Ua latou fola laupama i le ala x3

Ua latou fola laupama i le ala

Ua afio mai le Tupu

Ua tietie atu i Ierusalema

I Ierusalema x2

Ua tietie atu i Ierusalema

I luga o le asini


A'OA'OGA:

1. O le laau o le pama o se laau aogā. (Ia faapena tatou tamaiti, ia tatou aoga mo soo se mea lelei.
2. Na faia e le Atua le laau o le pama e aogā mo i tatou uma.

TATALO:

Ia saunia e lau susuga se tatalo e faauma ai le mataupu.

ATA: LAAU O LE PAMA



ASO SA: 21 APERILA 2019

MATAUPU: O LE TOETU (ASO SA O LE TOETU)

SINI: Ia a'oa'oina tamaiti ia malamalama i le mea na tupu i le Aso Toetu.

TUSI FAITAU: Mataio 28:1-20 (mo le faiaoga)
Mataio 28:6 (mo le vasega)

“E le o iinei o ia, auā ua toe tu mai o ia, pei ona fetalai atu o ia. O mai, ina matamata i le mea na tuu ai o ia.”

FESOASOANI MO FAIAOGA:

FAATINO LE TALA UA SAUNIA E LE FAIAOGA

Tagata e i ai i le tala. – 1. Maria le Makatala 2. Maria 3. Agelu 4. So'o o Iesu
Fai faatinoga a Maria ma Maria a'o faitau le vaega a le faamatala.

Faamatala: Ua mavae le aso Sapati, ua tafa ata o le uluai aso o le vaisapati, ona o atu ai lea o Maria le Makatala ma le isi Maria e asiasi i le tuugamau.

Faauta foi, ua to le mafuie tele aua na alu ifo le agelu a le Alii mai i le lagi, ua alu atu ma fuli ese le ma'a ma tietie i ona luga.

Ua taunuu atu tinā ia i le tuugamau ua nā o le agelu ua faapea mai.

Agelu: E lē o iinei o ia, auā ua toetu mai o ia. O mai ina matamata i le mea na tuu ai o ia. Ina o atu ia ia vave, ta'u atu i ona so'o, ua toe tu mai o ia nai e ua oti.

Faamatala: Ona fo'i ai lea o fafine ma le fefefe ma le fiafia tele. Ua taufetuli e ta'u atu i ona soo. A o i ai i lāua i le ala, na latou fetai ai ma Iesu.

Iesu: “Si o'u alofa”

Faatinoga: Omai fafine ua fetagisi i ona vae, ma ifo mai ia te ia.

Iesu: “Aua lua te matatau ina o atu ia, lua te ta'u i o'u soo ina ia o atu i Kalilaia latou te iloa mai ai au.”

(Vaaiga i le nofoaga ua potopoto ai ona so'o i Kalilaia)

Maliu atu Iesu, ua latou iloa o ia ona latou ifo mai lea (foliga ofo nis ae foliga masalosalo nisi)

Iesu: Ua tuuina mai ia te au le pule uma lava i le lagi ma le lalolagi. O lenei ia outou o atu e fai nuu uma lava ma so'o ma papatiso atu ia te i latou i le Suafa o le Tamā ma le Atalii ma le Agaga Paia, ia outou a'oa'o atu ia te i latou ia tausi i mea uma ua ou fai atu ai ia te outou i aso uma lava e oo lava i le gataaga o le lalolagi.

VASEGA: Manuia leAso Sa o le Toetu (Tagata Uma)

GALUEGA FAATINO:

1. Tala Faatino: Ia faatino le tala ua saunia ina ia malamalama lelei le vasega i le tāua o lenei aso.

PESE:

E le o maliu le Atua / God's not Dead, He's Alive

“IA MANUIA LE TOETU”

ASO SA: 28 APERILA 2019

MATAUPU: ARASI MA PEROSI

SINI: “Ia a’oa’oina le vasega ia iloa ia laau ma o lā aogā.

TUSI FAITAU: 1 Tupu 5:1-10 (mo le faiaoga)
1 Tupu 5:8 (mo le vasega)

“Ona sau lea o le feau a Hiramō ia Solomona, ua faapea mai, Ua ou faalogo i mea na sau ai lau feau ia te au; ou te faia mea uma ua e finagalo i ai i laau o arasi, ma laau o perosi.”

FESOASOANI MO FAIAOGA:

Ua mavae le nofoaiga a le tupu o Tavita, ona tulai mai loa lea o lona atalii o Solomona. Ua manatu Solomona o le a ia faia le fale o le Alii le Atua (po’o le malumalu). E le’i faia e lona tamā o Tavita a’o le galuega lea na manao lona tamā na te faia.

Sa faasaga loa le tupu o Solomona e fai le fale o le Alii. Ua ia feau atu ia Hiramō le tupu o Turo, ina ia fesoasoani ia te ia i laau e fai ai, o laau e sili ua igoa o le arasi ma le perosi mai Lepanona. Sa talia fiafia e Hiramō le mana’o o le tupu o Solomona.

Ua ta laau o le arasi ma le perosi ma auina atu ia Solomona e fai ai le fale o le Alii, ina ua uma le faiga o le malumalu, ona fai loa lea o le fale o Solomona i laau lava ia o le arasi ma le perosi. O laau ia o laau tupu tetele matagofie ma malolosi, ola mafalā ma ola lelei ma e tele i Lepanona. E lelei nei laau ua faaogaina e fau ai le malumalu o le Atua.

Tamaiti manaia ia laau ma o lā aoga. Ia o se faamanatu lelei foi lea mo i tatou. Ia tatou alolofa ma fesoasoani i o tatou aiga ma so’o se tasi lava.

GALUEGA FAATINO:

(A) Fesili ma Tali

1. O a igoa o laau ia sa tāua i le mataupu?

Tali: O le arasi ma le perosi.

2. O a ni galuega na fa’aaoga i ai nei laau?

Tali: Na fai ai le malumalu o le Atua ma le maota o le tupu.

3. O fea e ola tele ai nei laau?

Tali: O Lepanona.

4. E faapeī le tutupu o nei laau?

Tali: E tutupu tetele lauolaola malolosi ma ola mafalā.

(E) Valivaliga Ata.

Fai ni kopi o ata ua saunia e valivali e tamaiti

PESE:

O LE PEROSI MA LE ARASI: fati (logo tagitagi/Jingle bells)

O le Perosi ma le Arasi
O ni laau tupu tele
O lā mafala e mapu iai
Le tele o manulele
Na fausia ai e Solomona
Le malumalu o le Atua
Faapea foi ma lona maota
I laau mai Lapanona

A'OA'OGA:

1. Ia avea tatou o ni tamaiti aogā i soo se galuega lelei pei o le aogā o nei laau.
2. O Arasi ma Perosi na fau ai le malumalu ma le fale o le tupu o Solomona.

TATALO:

Ia saunia e lau susuga i le faiaoga se tatalo e faauma ai le mataupu.

ATA: O LE LAAU O LE ARASI



ATA: O LE LAAU O PEROSI



MANATU TAIALA O ME 2019: O TINA AGALELEI O LO’O TĀ’UA I LE TUSI PAIA

O lenei masina o loo faamanatuina ai pea le Aso Sa o tinā, o le masina foi o le Fonotele i Malua. E manatua o le a faia pea lesona e saga faatāuaina ai pea tinā i totonu o aiga mo le fanau.

ASO SA: 5 ME 2019

MATAUPU: O LE AGALELEI O RAAVA

SINI: Ia a’oa’oina le vasega i le alofa ma le agalelei o Raava na faasaoina ai tagata Isaraelu e toalua na asiasi atu i Ieriko.

TUSI FAITAU: Iosua 2:1-24 (mo le faiaoga)
Iosua 2:4 (mo le vasega)

“A ua uma ona ave e le fafine o ia tagata e toalua, ua nanā ia te i laua ma ua faapea ona fai atu, Na o mai tagata ia te a’u, a ou te lei iloa pe na o mai ifea i lāua.”

FESOASOANI MO FAIAOGA:

O le tatou tala i lenei taeao, o le tinā ia Raava. O le fafine mai Ieriko sa agalelei i tagata e toalua mai Isaraelu na asiasi atu i lona nuu. E lē faatagaina tagata ia e le tupu i totonu o lea aai. Ona auina atu lea e le tupu o ana fitafita e su’e i le fale o Raava.

Sa agalelei ma alofa i ai o ia. Sa ia nanā ma faalafi i lāua. Sa ia ava’e nei tagata i luga o lona fale ma tanumia ia tei lāua i laau o lino na folasia i luga o le fale. Ua lē maua ai e fitafita i lāua.

Ua faasaoina i lāua ma ua sauni e toe fo’i. Ona la faafetai lea ia Raava i lona agalelei. Ua la fai foi ia te ia, o le taimi o le a o mai ai Isaraelu, ia faapotopoto uma e ia lona aiga atoa i lona fale ma nonofo ai. Ia fai foi se fu’a mūmū ma nonoa i se maea i le faamalama, o le faailoga lenā e faasaoina ai o ia ma lona aiga.

GALUEGA FAATINO:

(A) Fesili ma Tali:

1. O ai foi le igoa o le fafine agalelei lea sa tatou talanoa i ai?
Tali: Raava
2. O ai le igoa o le nuu lea sa nofo ai Raava?
Tali: O Ieriko

3. Na faapefea ona ia faalafi tama ia e toalua?

Tali: Na ia ava'e ia tei laua i luga o le fale ma tanumia i laau o lino na folasia ai luga o le fale.

4. O le a le faailoga sa fai atu ai nei tagata e toalua ia Raava e faasaoina ai o ia ma lona aiga?

Tali: Ia nonoa se fu'a mūmū i se maea i le faamalama o lona fale.

(E) TUSIGA ATA:

1. Saunia e le faiaoga fu'a mūmū e nonoa i ni fasi laau, faaoga ai ni fasi ie mūmū (fai ni fu'a se 5 pe sili atu mo le vasega)

2. Filifili le tamaititi i le upu e tusi i luga o le ata o lona fu'a – Agalelei, Alofa

(I) ATA TIFAGA: O lo'o i ai le ata i le ofisa A'oa'oga Kerisiano i Tamaligi e matamata ai le fanau.

PESE: 32 Tusi Pese Aoga Aso Sa – 2004

O Iesu lo'u Alii

O lou Faaola

O lana fu'a i o'u luga o le Alofa x2

Jesus is mine

And I am His

His banner over me is love x2


A'OA'OGA

1. O Raava o le tina agalelei.
2. Ia alofa ma agalelei i tagata ese.
3. Ia tau le alofa i le alofa.

TATALO:

Ia saunia e le faiaoga se tatalo e faauma ai le mataupu.

ATA: O LE AGALELEI O RAAVA.



ASO SA: 12 ME 2019
(ASO SA TINĀ)
MATAUPU: O LE FAFINE SAREFATA

SINI: Ia a’oa’oina le vasega o le fafine Sarefata sa agalelei i le tausiga o le perofeta o Elia.

TUSI FAITAU: 1 Tupu 17:8-16 (mo le faiaoga)
1 Tupu 17:9 (mo le vasega)

“Tulai ia ma e alu i Sarefata, o le aai o Saitonu, ma e nofo ai, faauta ua ou fai atu i le fafine o i ai ua oti lana tane, na te fafaga ia te oe.”

FESOASOANI MO FAIAOGA:

O le agalelei o le fafine Sarefata ia Elia, na manuia ai laua ma lana tama. Ua fetalai mai le Atua i le perofeta o Elia e alu i Sarefata ma nofo i le fale o le fafine ua oti lana tane, o le a ia tausii ia te ia. O le taimi lea o loo oge le nuu.

Ua o’o atu Elia i Sarefata, ua na iloa atu le fafine o fai fafie. Ua ia valaau atu i ai sei aumai sina fasi areto sei ai ai. Ua tali mai le fafine, “o lo’o soifua le Alii, e leai se potoi areto ia te au. Ua toe lava o sina fasi falaoa ma sina suauu itiiti i le fagu o totoe. O lo’o fai fafie o ia e fai ai le meaai ma si ana tama, ona la feoti ai lea aua ua leai lava se meaai o totoe. O lona uiga tamaiti e talitonu le fafine ua iloa e le Atua lona mativa. Ua iloa e le Atua le itiiti o mea o totoe e aai ai.

Ua fai atu le perofeta o Elia i le fafine. “Aua e te fefe! Alu e fai le mea lea ou te fai atu ai. Aumai ia te au se potoi areto itiiti, faatoa lua aai ai lea ma lau tama. Ua toe fai atu Elia, “Ua fetalai mai le Alii le Atua o Isaraelu, e le faaitiitia le suauu i le fagu, ma le falaoa i le kate seia o’o i le aso e foaiina mai e le Alii le ua i le laueleele.”

Ua faia e le fafine e pei ona fai atu ai Elia. Sa tele aso na nofo ai le perofeta i lea aiga ma sa le’i uma le falaoa i le kate, e le’i faaitiitia foi le suauu i le fagu.

UIGA O UPU:

Oge Ua mativa, ua leai se meaai, ua leai ni laau e ola lelei ona ua leai ni timuga.

Ua: o le timu

Potoi areto: fasi falaoa itiiti

Falaoa i le kate: falaoa mata i le mea e tu’u ai. (flour in the container)

Suauu i le fagu: suau'u e fai ai meaai i totonu o le fagu. (cooking oil in the bottle)

Sarefata: silasila i le pito i tua o le Tusi Paia i le faafanua o Palesitina o loo i ai.

GALUEGA FAATINO:

(A)FESILI MA TALI:

1. O fea le nu'u lea na alu i ai le perofeta o Elia?
Tali: O Sarefata
2. O ai sa nofo ai ma tausia Elia i Sarefata?
Tali: O le fafine ua oti lana tane.
3. O le ā le tali a le fafine ia Elia ina ua ia manao i se potoi areto.
Tali: Ua toe lava o le la meaai ma si ana tama ona lā feoti lea.
4. O le ā le faamanuiaga na maua e le fafine i lona agalelei ia Elia?
Tali: Ua lē uma le falaoa i le kate ma ua lē faaitiitia le suauu i le fagu.

(E)Faatino le tala: O tagata e tatau ona i ai o Elia, fafine ma lana tama. Ia saunia foi ipu vai, se falaoa, fagu suau'u (cooking oil). I le faaiuga o le tala – Tauloto faatasi e le vasega le faamanuiaga na maua e le fafine ma si ana tama. “UA LĒ UMA LE FALAOA I LE KATE, UA LE FAAITIITIA LE SUAUU I LE FAGU.”

PESE:

Suauu i lau lamepa ia mu pea	Give me oil in my lamp, keep me burning
Suauu i lau lamepa la'u tatalo	Give me oil in my lamp I pray
Suauu i lau lamepa ia mu pea	Give me oil in my lamp, keep me burning
Ia mu pea seia tafa mai o ata.	Keep me burning till the break of day

Pese Osana, Pese Osana	Sing Hosannah! Sing Hosannah!
Pese Osana i le tupu o tupu	Sing Hosannah to the king of king
Pese Osana, Pese Osana	Sing Hosannah! Sing Hosannah!
Pese Osana i le tupu o tupu	Sing Hosannah to the king of kings

A'OA'OGA:

1. E faamanuia le Atua i le tagata alofa ma agalelei.
2. E faamaoni le Atua i Ana folafolaga.
3. Ia tatou alolofa ma agalelei i tagata uma.

TATALO:

Sauni e lau susuga i le faiaoga se tatalo e faauma ai le mataupu.

ATA: O LE FAFINE SAREFATA



ASO SA: 26 ME 2019

MATAUPU: O LE TINĀ MATIVA.

SINI: Ia malamalama le vasega sa fesoasoani le perofeta o Elisaia i le tinā mativa sa alofa faamaoni ma agalelei i lana fanau.

TUSI FAITAU: 2 Tupu 4:1-7 (mo le faiaoga)
2 Tupu 4:7 (mo le vasega)

“Alu ia ina faatau atu se suau’u i le e tauai atu i le tagata ua outou aitalafu ai a o mea ua totoe ia ola ai oe ma au tama.”

FESOASOANI MO FAIAOGA:

O le tala lenei i le fafine mativa, o le avā a le tasi soo o le au perofeta. Ina ua oti lana tane, ua o’o si ona aiga i se tulaga mativa ma le lima vaivai, ae o lo’o i ai sa latou aitalafu. Ua faailoa mai e lē na aumai ai le aitalafu, afai ae le totogiina o le a avatu lana fanau tama e toalua e fai ma ana pologa.

Sa ia su’e fesoasoani loa i le perofeta o Elisaia. Sa fesiligia e le perofeta poo a ni mea o i lona fale. Sa tali atu le fafine, ua leai lava se mea vagana le fagu suauu e tasi. Na fai atu Elisaia i le fafine; “Ia e nō ipu i tua i tagata uma ua lata mai ia te oe, o ipu le susua, aua le itiiti.” O lona uiga ia o atu le fafine ma lana fanau e saili mai ni ipu poo ni fagu mai ē tuaoi ma a latou uo. A maua ona latou o lea i totonu o lo latou fale, ia tapuni le faitotoa, ma utu le suauu i totonu o fagu ma ipu.

O le mea ofoofogia na tupu ua tutumu uma fagu ma ipu ae ua totoe pea le suau’u. Sa lagona e lenei fafine le fiafia ma le olioli tele ona o le vavega ua faia e Elisaia mo ia ma lona aiga. Na fai atu Elisaia ia te ia, *“alu ia oe ma faatau atu le suau’u e totogi ai le aitalafu a o le suauu ua totoe, o mea na e ola ai oe ma lau fanau.”*

Tamaiti vaai la i le alofa o le Atua i le fafine ma lana fanau, ua totogi le aitalafu ua le avea tama e fai ma pologa.

UIGA O UPU:

Nō: faanoi e faaaogā. (borrow)

Perofeta: o se tagata ua filifilia e le Atua e fai ma ana avefeau.

Ipu: ipu sa fau i le ele; ipu na fai sa faaaoga i nā aso.

GALUEGA FAATINO:

Fesili ma Tali:

1. O ai le fafine na sau ia Elisaia?
Tali: Fafine ua oti lana tane, ma ua mativa.
2. O le a se mea na totoe i le fale o le fafine sa faaaoga e Elisaia e maua ai se tupe?
Tali: O le fagu suau'u e tasi.
3. O a mea na nō mai i tuaoi ma uo a le fafine ma lona aiga?
Tali: O fagu ma ipu e utu ai suau'u.
4. E toafia le fanau tama a le fafine?
Tali: E toalua
5. O le a le mea ofoofogia na faia e Elisaia mo le fafine ma lana fanau?
Tali: Ua faateleina le suau'u mai le fagu suau'u e tasi sa i ai.

Valivaliga Ata: Ia fai ni kopi o le ata ua saunia e tufa i le vasega e galulue ai.

PESE:

Le alofa o le Atua
Pei o se lio tele
E taamilo lava leai se mutaaga
Le alofa o Keriso fai pea e le gata
E alofa mai o Ia i aso uma lava.


A'OA'OGA:

1. E fesoasoani mai le Atua i lo tatou vaivai ma le mativa.
2. E alofa le Atua i tagata uma.
3. Ia tatou alolofa i tagata matitiva.

TATALO:

Ia sauni e lau susuga se tatalo e faauma ai le mataupu.

ATA: O LE TINA MATIVA



MANATUA TAIALA O IUNI:**O MAUGA I LE TUSI PAIA.**

Ua filifilia nisi o mauga tauta'ua e masani i ai le faalogo a tamaiti ma ia latou iloa po'o le ā se mea na tupu ai ma se aoga i le Tala Lelei.

ASO SA: **2 IUNI 2019**

MATAUPU: **O LE MAUGA O HOREPA**

SINI: Ia a'oa'oina le vasega ina ia malamalama o le mauga o Horepa na mu ai le laau talatala.

TUSI FAITAU: Esoto 3:1-12 (mo le faiaoga)
Esoto 3:2 (mo le vasega)

“Ua faaali mai ai ia te ia le agelu a le Alii i le afi mumu i totonu o le laau talatala ona vaai atu lea o ia, faauta o loo mu lava le laau talatala i le afi, a e lei faaumatia le laau talatala.”

FESOASOANI MO FAIAOGA:

Sa leoleo Mose i le lafu mamoe a le tamā o lana avā o Ietero, i Mitiana ua ave lava le lafu i tala ane o le mauga o Horepa. O iina na vaaia ai e Mose le laau talatala o lo'o mu i le afi ae le faaumatia le laau talatala. Ua ia afe ane i ai e matamata ae faalogo ai i se leo ua faapea mai, Mose e! Ua ia tali atu – O au lenei, ona fetalai mai lea o le Atua, Aua e te faalatalata mai iinei, ina to ese ia ou seevae i ou vae, aua ua sa lava le eleele o lo'o e tu ai. Na ia fetalai atu ma faailoa ia Mose, o Ia lava o le Atua. Ua ia finagalo foi ia alu Mose e aumai lona nuu mai Aikupito i le mea sa nofo pologa ai.

O nisi na o mea tāua na tutupu i le mauga lea o Horepa.

- Vaaia ai le laau talatala o lo'o mu i le afi ae le faaumatia.
- Faailoa ia Mose e le Atua, e alu e faafoi mai lona nuu mai Aikupito.
- O le isi igoa o le mauga o Horepa o le mauga o Sinai.
- Silasila i le faafanua i le Tusi Paia i nuu sa femalagaai ai Aperaamo.

GALUEGA FAATINO:

(A) Fesili ma Tali:

1. O a mea sa fai a Mose i Mitiana?
Tali: Sa leoleo i le lafu mamoe a Ietero le tamā o lona toalua.
2. O ai ni vaaiga na iloa pe faalogo ai Mose o le mauga o Horepa?
Tali: O le laau talatala ua mu i le afi, ae lē faaumatia.
(tautala mai ai le leo mai le laau, “Mose, Mose.....”)

3. O le ā le isi igoa o le mauga o Horepa?

Tali: O le mauga o Sinai.

(E) PASO

1. Ia fesootai laina mai fuainumera (laititi agai i luga) Fai ni kopi o le ata ua saunia ma ave i tamaiti e galulue ai.

2. A maea ona feso'otai numera, sipela le upu ma ta'u.

PESE:

Climb, climb up sunshine mountain
Heavenly breezes blow
Climb, climb up sunshine mountain
Faces all aglow
Turn, turn your back on evil
Look to God on High
Climb, climb up sunshine mountain
You and I

A'e, a'e i luga o mauga
Pupula mata o lo'u agaga
A'e, a'e i luga o mauga
Pupula mata faaleagaga
Liliu, liliu lou tua i le leaga
Vaai le Atua ia luga
A'e, a'e i luga o mauga
Outou ma au.

A'OA'OGA:

1. O le mauga o Horepa na mu ai le laau talatala.
2. E afio foi le Atua i le mauga.

TATALO:

Saunia e lau susuga se tatalo e faauma ai le mataupu.

ATA: MAUGA O HOREPA



ASO SA: 9 IUNI 2019

MATAUPU: O LE MAUGA O ARARATA

SINI Ia a'oa'oina tamaiti malamalama, o le mauga o Ararata na to'a ai le vaa o Noa.

TUSI FAITAU: Kenese 8:1-22 (mo le faiaoga)
Kenese 8:4 (mo le vasega)

“O le fitu o masina, ma lona aso e sefulu ma le fitu, ua to'a ai le va'a i luga o le mauga o Ararata.”

FESOASOANI MO FAIAOGA:

Tamaiti o ai foi lea na fau le vaa? Ioe, o Noa, o le vaa la lea na to'a pe na paulia i luga o le mauga o Ararata.

Ina ua finagalo le Atua o le a uma le lolo, ona ia faaagi mai lea o le matagi ona maui ai lea o le vai. Pe tusa ma le 150 aso na ufitia ai le fogaeleele, ua faaitiitia le vai, seia o'o ina paulia le vaa i le mauga o Ararata.

O le mauga o Ararata e i Aremania e lata i le fanua o Etena. O le mauga maualuga. (17, 112 futu). O luga foi o le mauga lea na ulufafo ai Noa ma lona aiga ma manu uma ia na faasaoina. Ua matutu le eleele ua ulufafo uma i latou ona faia lea e Noa le fata faitaulaga, ua faaogaina foi nisi o manu vaefa uma e mamā ma manu felelei uma e mamā e fai ai le taulaga mu. Ua lagona foi e le Alii le manogi lelei. Ona faamanuia lea o le Atua ia Noa ma lona aiga.

Ia o mea uma nei na tutupu i luga o le mauga o Ararata.

UIGA O UPU:

manu mamā - manu lelei e mafai ona aina e fai ai taulaga, e lelei e o'o atu le manogi i le Alii.

GALUEGA FAATINO:

Valivaliga Ata:

1. Ia fai ni kopi o le ata ua saunia e tufa i le vasega e galulue ai.
2. FESILI MA TALI:
 1. O le a le mauga lea na paulia ai le va'a o Noa?
Tali: O le mauga o Ararata.
 2. O le ā le umi na ufitia ai le fogaeleele i le suavai?
Tali: E 150 aso.

3. Ina ua ulufafo Noa, o lona aiga ma manu na faasaoina; o le ā le mea na muamua fai?

Tali: Na faia le fata faitaulaga ma saunia le taulaga faafetai i le Atua.

PESE:

Toe faamanatu le pese sa i ai i le Aso Sa talu ai.

A'OA'OGA:

1. E fa'asaoina le tagata usitai.
2. E manuia le fanau po'o le aiga e usitai i le tamā ma le tinā.

TATALO:

Ia saunia pea e lau susuga i le faiaoga se tatalo e faauma ai le mataupu.

ATA: MAUGA O ARARATA



ASO SA: 16 IUNI 2019

MATAUPU: O LE MAUGA O KARAMELU

SINI: Ia a’oa’oina le vasega ina ia malamalama o le mauga lea sa osi ai le taulaga a Elia ma perofeta a Paala.

TUSI FAITAU: 1 Tupu 18:20-40 (mo le faiaoga)
1 Tupu 18:38 (mo le vasega)

“Ona paū ifo lea o le afi a le Alii, ma faaumatia ai le taulaga mu, ma fafie, ma maa ma le eleele ua mitiia ai foi le vai sa i le utu.”

FESOASOANI MO FAIAOGA:

O le mauga o Karamelu o se mauga matagofie i Palesetina. O le mauga maualuga ma lafulafuā, o lona uiga e ola lelei ai laau ma vao, ma manu o le vao ma manu felelei. Ao le tāua o le mauga o Karamelu, sa faia ai le faiga taulaga a le perofeta o Elia ma perofeta a Paala. O faiga taulaga e iloa ai po’o ai le Atua moni, ina ua le usiusitai le fanauga a Isaraelu i le Atua, ae ua latou mulimuli i le Atua faapaupau o Paala.

Sa faapotopoto e Elia le fanauga a Isaraelu ma perofeta e 450 a Paala i luga o le mauga o Karamelu sei latou saili po’o ai le Atua moni po’o le Atua po o Paala. Sa faatonuina e Elia perofeta a Paala e fai se fata faitaulaga ia tapenaina se povi ia vaevaeina lelei, ia i ai ni fafie ae aua nei i ai se afi. Ua maea ona tapenaina ona fai lea i ai o Elia ia latou valaau ia Paala e aumai se afi e faamu ai le taulaga. Sa amata ona tau valaau ma alalaga perofeta e 450 a Paala mai i le taeao seia oo atu i le afi peitai e lei tali mai Paala. Sa pepese ma sisiva ua latou faamanu’alia o latou tino i mea maamaai e tusa ma latou tu ma aga ae le’i tali mai lava Paala.

Ona alu lea o Elia ua na aumai maa e sefulu lua e faataamilomilo e fai ai le fata faitaulaga. Ua i ai fafie ma le povi e fai ai lana taulaga. Ua ia faatonu foi le fanauga a Isaraelu, ina ia la’u faatolu mai ni vai e fui atoa ai le fata faitaulaga, seia o’o lava ina ua tafe le vai ua soo ai le fata faitaulaga ua tumu foi le utu i le vai.

Ona tatalo lea o Elia i le Atua, “Ia faailoa i lenei aso, o oe o le Atua moni o Isaraelu.” Ona pau ifo lea o le afi a le Alii ma faaumatia ai le taulaga mu, ma fafie ma ma’a ma le eleele ua mitiia ai foi le vai sa i le utu.

UIGA O UPU:

Utu - autu (trench)

Mauga o Kramelu –silasila i le Tusi Paia i le faafanua, nuu na malaga ai Aperamo.

GALUEGA FAATINO:

(A) Fesili ma Tali

1. O fea na tu ai le mauga o Karamelu?

Tali: I totonu o Palesitina

2. O le ā se tāua o le mauga?

Tali: Sa fai ai taulaga a Elia ma perofeta a Paala e iloa ai po'o ai le Atua moni.

3. O le ā la se tali o ia taulaga?

Tali: Na auina mai le afi e le Atua ma mu ai le taulaga a Elia.

(E) Valivaliga Ata

1. Ia fai ni kopi o le ata ua saunia e galulue ai le vasega. (Ata o le taulaga a Elia)

PESE:

O le Atua e tele, e malosi matautia

E leai se mea e faigata ia te Ia.

O vaitafe na ia faia, o atumauga na ia faia

Le lalolagi ua fusia e le alofa

O le Atua e telē, e malosi matautia

E leai se mea e faigata ia te ia.

My God is so big, so strong and so mighty

There's nothing my God can not do

The rivers are His, the mountains are His

The whole world is under His Love

My God is so big, so strong and so mighty,

There's nothing my God cannot do.

A'OA'OGA:

1. E matagofie le mauga o Karamelu.
2. Na faailoa mai le Atua moni i luga o le mauga o Karamelu.
3. Na faafofoga le Atua i le tatalo a Elia.
4. Na tali mai le Atua e ala i le afi.

TATALO:

Ia saunia e lau susuga se tatalo e faauma ai le mataupu.

ATA: FAIGA TAULAGA A ELIA LE PEROFETA MA PEROFETA PAALA



ASO SA: 23 IUNI 2019

MATAUPU: O LE MAUGA O OLIVE

SINI: Ia iloa e le vasega na tagi Iesu mo Ierusalemā i luga o le mauga o Olive.

TUSI FAITAU: Luka 19:41-44 (mo le faiaoga)
Luka 19:41 (mo le vasega)

“Ua latalata o ia, ua silafia e ia le aai, ona tagi ai lea o ia”

FESOASOANI MO FAIAOGA:

O le mauga o Olive e tu i le itu i Sasa’e o Ierusalemā. Sa faaigoaina lea mauga i le igoa lea ona sa tele olive e tutupu ma ola ai. E le o se mauga maua luga tele. A o’o atu le tumutumu o le mauga, ua taatia mai le aai o Ierusalemā, ua iloa atoa uma.

O luga o le mauga lea o loo i ai le fanua lea o Ketesemane lea na tatalo ai Iesu. A’o agai ifo Iesu mai le tumutumu o le mauga, ua ia silasila ifo i le taatia mai o le aai o Ierusalemā. Ua silasila ifo Iesu ona tagi ai lea o Ia. Aiseā ua tagi ai Iesu tamaiti? Ioe, ona o le alofa.

O Ierusalemā, o le aai e paia i le mafaufau ma le manatu o le tagata Iutaia. O le aai foi sa tu ai le malumalu e tapuai ai tagata Iutaia ma le talitonuga atoa e afio le Atua i le malumalu. Peitai ua faasolo ina lē usitai tagata ma lē fia faalogo i le Atua.

O le mafuaaga lea na tutulu/tagi ai le Alii o Iesu i luga o le mauga o olive, ona o le alofa moni mo tagata agasala i Ierusalemā, ina ia liua o latou lotu, ma ia latou lagonaina le salamō ma toe faalogo i le Atua.

GALUEGA FAATINO:

A.Fesili ma Tali

1. O fea e tu ai le mauga o Olive?
I le itu i sasa’e o Ierusalemā.
2. O le a le igoa o le fanua i luga o le mauga?
O le fanua o Ketesemane.
3. Ina ua agai ifo Iesu mai luga o le mauga o Olive, o le ā se na iloa atu e Iesu?
O le aai o Ierusalemā
4. Aisea e tāua ai le aai o Ierusalemā i tagata Iutaia?
Ona sa tu ai le malumalu, o le ogatotonu o le lotu Iutaia.

5. Aisea na tagi ai Iesu i luga o le mauga o olive?
Ona o lona alofa mo tagata uma i Ierusalema.

E. Valivaliga Ata. Fai ni kopi o ata ua saunia e tufa i le vasega e galulue ai.

PESE:

Na faia e le Atua mauga maualuluga
Na faia e le Atua laau
Na faia e le Atua o manu felelei
Na faia e le Atua o pi
Na faia e le Atua o ia o le sami
Na faia e le Atua o le sami
A o le sili o na mea
Le iuga o na mea
Na faia e le Atua o a'u.

God made the mountains high
God made the trees
God made the birds to fly
God made the bees
God made the fish to swim
God made the sea
And the best of all
The last of all
God made me.

A'OA'OGA:

1. Ua tagi Iesu i luga o le mauga o Olive.
2. E alofa Iesu i tagata uma.
3. E lē fiafia Iesu i tagata lē usiusitai i lona fingalo.

TATALO:

Ia sauni se tatalo e faauma ai le mataupu.

ATA: IESU I LE MAUGA O OLIVE



ASO SA: 30 IUNI 2019

MATAUPU: O LE MAUGA O NEPO

SINI: Ia malamalama le vasega o luga o le mauga o Nepo, na vaaia ai e Mose le nuu na folafolaina o Kanana.

TUSI FAITAU: Teuterenome 32:48-52 (mo le faiaoga)
Teuterenome 32:49 (mo le vasega)

“Ina alu ae ia oe i lena mauga... o le mauga o Nepo, oi le nuu o Kanana ua ou foaiina atu i le fanauga a Isaraelu e fai mo latou.”

FESOASOANI MO FAIAOGA:

O le mauga o Nepo e i totonu o le nuu o Moapi, o le isi igoa o le mauga lea o Peseka. Tamaiti, na fetalai le Atua ia Mose ina ia alu e tu i luga o le mauga o Nepo ina ia vaai atu o ia i le nuu sa folafolaina e le Atua o le a fai mo latou tofi. O le finagalo o le Atua mo Mose, tau lava ina ia vaai iai ona mata, ae o le a lē oo pe taunuu iai o ia.

Ua mafua lea tulaga ona sa lē usitai Mose i le finagalo o le Atua i le taimi sa iai le fanauga a Isaraelu i le nuu o Katesa. Na finau le nuu ma Mose ina ua fia feinu ona ua leai se vai i Katesa. Ona o lea o Mose ma lona uso o Arona ua tatalo i le Atua mo se laveai. Ua fetalai mai le Atua ia Mose, “Alu ia e tautala atu i le papa ona tafe mai ai lea o le vai. Ina ia iloa e le nuu le mamalu ma le silisiliese o le Atua.”

Peitai ua lē usitai Mose i le Atua. Sa ia alu atu i le papa, ua ia lē tautala i ai, ae ua ia taina faalua le papa i lona to’oto’o, ona tafe mai ai lea o le vai. O lenei vai ua faaigoaina o le Meripa-Katesa, o lona uiga ua finau ma le Alii.

Tamaiti, ona o le lē usitai o Mose i le finagalo o le Atua, o lea ua fetalai atu i ai le Atua. Ia alu i luga o le mauga o Nepo, ina ia vaai ona mata i le nuu sa folafolaina, auā o le a ia lē o’o i ai.

GALUEGA FAATINO:

Fesili ma Tali:

1. O le ā le igoa o le mauga sa fetalai le Atua ia Mose e alu a’e i ai?
O le mauga o Nepo.
2. O fea e tu ai le mauga o Nepo?
I totonu o le nuu o Moapi.
3. Aisea na alu ai Mose i luga o le mauga o Nepo?
E vaai atu o ia i le nuu sa folafolaina.

4. Aisea na lē o’o ai i le nuu sa folafolaina?
Ona sa lē usiusitai Mose i le finagalo o le Atua.

Valivaliga Ata: Ia fai ni kopi o ata ua saunia ma tufa i le vasega e galulue ai.

PESE: Tusi Pese EFKS – INA PEPESE IA

PESE 207

A’OA’OGA:

1. Ia ola usiusitai i le finagalo o le Atua.
2. E leai se taunuuga lelei pe a lē faalogo ma usitai.

TATALO:

Ia saunia e lau susuga i le faiaoga se tatalo e faauma ai le mataupu.

ATA: MOSE I LUGA O LE MAUGA O NEPO



MANATU TAIALA O IULAI:**O TALENI ESEESE MAI I LE ATUA**

Ia a'oa'oina ma malamalama le fanau o taleni o meaalofo ia mai i le Atua. E tofua uma lava tatou ma le taleni na aumai e le Atua. O taleni foi e tataua ona fa'aaoga mo le manuia o Aiga, Nuu, Ekalesia ma le atunuu.

ASO SA: 7 IULAI 2019

MATAUPU: O AMOSA LE FAIFA'ATOAGA

SINI: Ia a'oa'oina le fanau ia malamalama, o Amosa o le faifaatoaga na tofia e avea ma perofeta a le Atua.

TUSI FAITAU: Amosa 7:12-16 (mo le faiaoga)
Amosa 7:14e (mo le vasega)

“Ou te le se perofeta a'u nei, ou te le se atalii foi o se perofeta; ao le fagamanu a'u, ma le galue i sukamoru.”

FESOASOANI MO FAIAOGA:

O le ā le galuega a le faifa'atoaga e fai tamaiti? O le tama lenei o Amosa, e nofo i le tasi nuu lea o Iuta ua igoa o Tikoa e tausii lona aiga. O le tagata e fai faifaatoaga, failafumanu, e galue o ia e totō ma faamatagofie laau nei o sukamoru. E fiafia lava Amosa i lana galuega o lo'o faia, ma e faamaoni foi i ai, aua o lana galuega lea e tausii ai lona aiga. O Amosa foi, o le tagata e faamaoni i le Atua, e fiafia e mafuta i le Atua i le tatalo.

O le faamaoni lea o Amosa na valaau i ai le Atua ina ia alu e ta'u i ia Isaraelu le mea o lo'o manao i ai. O lona faamaoni fo'i lea na filifilia ai e le Atua e avea ma perofeta po o le faifeau. E lē talitonu Amosa aua e lē o ia o se atalii o se faifeau, peitai na alu lava ona o lona usitai i le manao o le Atua. Na manao le Atua ia Amosa e alu i Isaraelu e faailoa i ai, ua tiga Lona loto ona o le tele o ā latou agasala. Ae le gata i lea, ia ta'u atu ia Isaraelu o le a o'o mai malaia ia i latou ona o le agasala tele o le nuu.

Tamaiti, po o a lava galuega tatou te faia ma feau e tuuina mai ia i tatou e fai, ia faia ma le faamaoni. O Amosa sa faifaatoaga peitai na faamanuia i ai le Atua ona o lona faamaoni. A tatou faamaoni i soo se galuega e tuuina mai; e faamaoni foi le Atua e faamanuia mai i tatou. E manuia foi mea uma tatou te faia, ma manuia ai o tatou aiga.

UIGA O UPU:

Sukamoru - o le tasi lea laau tāua i totonu o Palesitina, e totō i tafatafa o auala e faamatagofie ai le aai o Palesitina. E 'aina ona fua ma e manaomia lava le tagata faamaoni e lava le onosai e faia lea galuega o le faamatagofie ma tausii i fua o le laau ina ia fua mai e suamalie i le ai. O le laau lea, a oo ina fotu mai ona fua ona ini lea i le atigilima poo se mea maai ona fua ia manua ina ia suamalie ona fua pe a oo ina pula. A lē faia lea tulaga, e fua mai ona fua e oona.

GALUEGA FAATINO:

1. Valivaliga Ata: Fai ni kopi o ata ua saunia e galulue ai le vasega.
2. Vavae le vasega ta'i-toatolu ae tofu ma ata ua saunia, ia valivali, ona oti lea ma faapipii i luga o se isi pepa ma faaigoa ata nei.

PESE: AMOSA : fati B I N G O

O Amosa o le tama

E fai faatoaga

A M O S A X3

Le igoa o le tama

E toaga e galue

I le faatoaga

A M O S A X3

Le igoa o le tama

A'OA'OGA:

1. Ia loto alofa pei o Amosa.
2. Faamaoni i soo se galuega.
3. Faalogo i le Atua.

TATALO:

Ia saunia e lau susuga i le faiaoga se tatalo e faauma ai le mataupu o lenei Aso Sa.

AMOS LE FAIFAATOAGA



ASO SA: 14 IULAI 2019

MATAUPU: O TAPITA LE SU'ISU'I

SINI: Ia malamalama le fanau i le tāua o le taleni lenei o le suisui e pei ona faia e Tapita.

TUSI FAITAU: Galuega 9:36-43 (mo le faiaoga)
Galuega 9:36 (mo le vasega)

“Sa i Iopa le tasi so’o fafine o Tapita le igoa, e ta’ua pe a faamatalaina, o Toreka; ua tele ana galuega lelei ma mea alofana ia faia.”

FESOASOANI MO FAIAOGA:

O ai le tamaititi e iloa e lona tinā su’isu’i? Amuia oe pe afai e iloa e lou tina su’isu’i, aua e leai se mea e popole ai i le su’iina o ofu. E mafai foi ona avea le taleni lea o le su’isu’i ma au taleni pe a e matua. O le tina lenei o Tapita, o le isi ona igoa o Toreka, o se tina e poto e suisui, e sau mai i le nuu lea o Iopa. E alofagia o ia e tagata o lona nuu ona o galuega lelei na ia faia. Sa ia fa’aaoga lana taleni lea o le suisui e fesoasoani ai i tagata. Na ia suiina ofu mo fafine ua leai ni ō latou taitoalua ma fai meaalofofa i ai. O le taleni lenei o le su’isu’i o se taleni e aogā tele mo tagata uma, ae amuia foi le tagata e iloa su’isu’i pei o Tapita.

O Tapita o se tina lelei, e loto alofa ma o le taleni lea na foai i ai e le Atua e fesoasoani ai mo ia ma lona aiga. Soo se taleni ua tuuina mai e le Atua, ia tatou fa’aaoga ma fiafia i ai aua o le meaalofofa mai i le Atua. A faapea o le pese, ia fiafia e pese, a faapea o taaloga, ia fiafia foi e taalo. E amata mai nei lava se ia o’o ina e matua ona faataitai i le taleni lea e te fiafia i ai faatasi ai ma le fesoasoani mai a le Atua, ona lelei loa lea ma atoatoa pe a o’o ina e matua.

UIGA O UPU:

Tapita: O le igoa lea o le tina lenei na iloa ai e lona nuu o Iopa.

Toreka: O le isi ona igoa lea na faaigoa ai ona o galuega lelei na fai. (*toreka: o le manu e matagofie e pei o le sevi e maua i atunuu o Aferika ma Asia*)

GALUEGA FAATINO:

Faapipiii vaega o ofu nei. Faaoga le laupapa e faapipii i ai e le fanau po o ni cardboards foi pe a maua.

PESE: I love you Jesus

I love you Jesus

Deep down in my heart

Let's talk about

Deep! Deep!

Down! Down!

Deep down in my heart

Let's talk about

Deep! Deep!

Down! Down!

Deep down in my heart

A'OA'OGA:

1. O Toreka o se tina alofa.
2. Ia fesoasoani ia tina i soo se feau.

TATALO: Saunia e lau susuga i le faiaoga se tatalo e faauma ai le mataupu a le fanau.

ATA: TAPITA / TOREKA LE SUISUI



ASO SA:

21 IULAI 2019

MATAUPU:

UA TĀINA E TAVITA LE KITARA MO SAULO

SINI:

Ia a’oa’oina le fanau ia malamalama, o Tavita na ia taina le kitara e faafiafia ai Saulo le tupu.

TUSI FAITAU:

1 Samuelu 16:14-23/17:12 (mo le faiaoga)

1 Samuelu 16:18e (mo le vasega)

“ua ou iloa le atalii o Iese le Peteleema, ua poto ia e ta i le kitara; o le tagata malosi tele, ma le toa, ma le mau upu, o le tagata aulelei, o loo ia te ia foi le Alii.”

FESOASOANI MO FAIAOGA:

O Saulo o le tupu muamua lea o Isaraelu, o se tupu malosi ma o se tupu e fiafia foi e faalogologo i musika. O Saulo o se tupu foi e vave lava lona ita. O taimi uma lava e ita ai le tupu, e manaomia lava se tagata e iloa ta le kitara e faalogologo ai e te’a ai lona ita. Na faatonu e le tupu ana auauna e saili mai se tagata e mafai ona ia taina le kitara aua ua tele lava lona ita. Na iloa e le tasi auauna le tama e igoa ia Tavita i Peteleema, ma o le tagata tonu lava lea e fetau ma le manao o le tupu.

O Tavita o lona tamā o Iese, o Tavita foi o le uii o le fanau e tovalu a Iese. O Tavita foi o le leoleo mamoe ia a lona tama, o lona tiute lea e faia i aso uma, o le leoleoina o mamoe. O Tavita e i ai lana kitara, ma o taimi uma lava e alu ai e leoleo mamoe a lona tamā, e alu ai ma lana kitara. A o’o i le taimi e aai ai mamoe ona ia ta lea o le kitara ma usu usu pese ma vaai mamoe. O le kitara o le tasi lea o mea fai faaili e faaogā mo le taina o pese, ma e lē o tagata uma e iloa faaogā le kitara.

Na aami e Saulo Tavita ina ia galue mo ia i le taina o le kitara e faatea ai lona ita. Sa tapena loa e Iese lona atalii o Tavita ma ua momoli mai ia Saulo le tupu. O le galuega lea a Tavita na fai mo le tupu o Saulo i aso uma, o le taina o le kitara ma pese e faanofo filemu ai le mafaufau o le tupu. O le galuega lea na faia e Tavita mo Saulo, o se galuega tāua tele. Ua na o Tavita lava foi i le maota o le tupu o lo’o i ai le taleni lea, ma e manaomia tele e le tupu.

Tamaiti o le tāua lea o taleni ua foai e le Atua mo tatou le fanau. E lē gata e fesoasoani mo tatou, ae fesoasoani foi mo isi tagata, e pei ona faia e Tavita mo Saulo le tupu. Ia faaogā tatau le taleni ua tuuina mai mo tatou e fesoasoani ai i tagata o lo’o manaomia le fesoasoani.

GALUEGA FAATINO:

1. Faatino le Tala: Faatino e susuga i faiaoga le tala mo le fanau.
2. Vali valiga Ata: fai ni kopi o ata ma tufa i tamaiti e galulue ai.

PESE:

O lima galue ma vae mo'emo'e
Meaalofa le Atua mo a'u ma oe
O lima ma vae na ia aumai fesoasoani le aso atoa
O mata vaai taliga faalogo meaalofa le Atua mo au ma oe
O mata, taliga na ia aumai fesoasoani le aso atoa.

Hands to work and feet to run
God's good gift to me and you
Hands and feet He gave to us
To help each other the whole day through
Eyes to see and ears to hear
God's good gift to me and you
Eyes and ears he gave to us
To help each other the whole day through.

A'OA'OGA:

1. E lelei le tā kitara a Tavita
2. Na fesoasoani Tavita ia Saulo.
3. Faaogā le taleni e fesoasoani ai mo isi tagata.

TATALO:

Faafetai le Atua mo taleni ua e tuuina mai matou te faaogaina ma fesoasoani ai isi tagata.

ATA: TAVITA O LOO FA'AFIAFIA MO SAULO



ASO SA: 28 IULAI 2019

MATAUPU: UA FAI E IESU LE TUNUIA

SINI: Ia a’oa’oina le vasega ia malamalama o Iesu le uo a tamaiti, na ia faia le tunuia mo ana uo.

TUSI FAITAU: Ioane 21:9-14 (mo le faiaoga)
Ioane 21:9 (mo le vasega)

“Ua latou tūta, ona iloa lea o le afi malala, o le i’a foi ua tunu ai, ma le areto.”

FESOASOANI MO FAIAOGA:

O Iesu lava ia o se uo alofa, e tele galuega lelei na ia faia mo tagata e manaomia le fesoasoani. O le tele lava o lona olaga o le a’oa’o atu i tagata i ala e manuia ai. O Iesu foi na faia faataitaiga lelei tatou te faata’ita’i i ai. O le tasi lenei o faataitaiga lelei na a’oa’o mai e Iesu pei o le tunui’a na i faia mo ana uo.

O le tunui’a o le meaai lea e faaoga ai i’a. E aumai i’a ona faamamā lea, ona susunu lea o ipu popo faamalala, ona tuu ai lea i luga o i’a ma liuliu ai se ia o’o lava ina vela lelei. Ua latalata mai le au soo i uta ma iloa ai le afi o loo ola mai i le matafaga, peiseaī o se tagata o loo faamafanafana ai. Ua latou taunuu mai i uta ma ua nonoa lo latou vaa. Na faateia i latou i le vaai atu o Iesu o loo tunu i’a i le afi malala. Ona valaau atu lea o Iesu ia aumai i’a e tunu i le afi. Ua latou nonofo ifo i lalo ua tunu a latou i’a ma aai fiafia ai ma Iesu i i’a ma areto na kukaina e Iesu.

I le tala lenei tamaiti, o ī tatou te iloa ai; o Iesu e lelei foi i le faatinoina o meaai. Ua lē gata ina tele galuega lelei ma faamalologa na ia faia mo tagata, peitai ua ia faia foi se meaai mo ana uo. O Iesu lava ia o le uo sili, e faamuamua e Ia le alofa mo isi tagata.

GALUEGA FAATINO:

1. Faatino le tala e faiaoga e toe matamata ai le fanau i le tala na faamatala ia malamalama atili ai.
2. Valivaliga Ata – Fai ni kopi o ata ua saunia e galulue ai le fanau pe a lava le taimi.

PESE: *fati* – (Ou te faia outou ma fai-faiva i tagata)

Iesu ua fai o lana tunuia
Lana tunuia, lana tunuia
Iesu ua fai o lana tunuia
Iesu ua fai lana tunuia

Ua taunuu ana uo
Ana uo, ana uo
Ua taunuu ana uo
Ua latou malolo

A'OA'OGA:

1. E alofa Iesu i ana uo.
2. Ua fai e Iesu le tunuia.

TATALO:

Faafetai tele Iesu la matou uo mo faaitaiga lelei ua e a'oa'o ai i matou. A'oa'o atili mai pea i matou ia matou taumafai pea e faata'ita'i i ala ua e a'oa'o mai e manuia ai i matou le fanau.

ATA: UA FAI E IESU LE TUNUIA



MANATU TAIALA O AOKUSO: E PULE AOA O LE ATUA I MEA UMA

O mataupu o lenei masina ua ootoo mai ai nisi o tala o loo atagia ai le pule aoao a le Atua i mea uma na ia faia. E ao pea ona faamanatu i le fanau e pule le Atua i mea uma lava e oo lava i le tagata. E tataua la i le tagata ona usitai i mea uma ua faatonu mai e le Atua, aua e faasala e le Atua le tagata e lē faia lona finagalo.

ASO SA: 4 AOKUSO 2019

MATAUPU: UA LIU TOTO LE VAI O AIKUPITO

SINI: Ia a’oa’oina le fanau ia malamalama, o le liu toto o vai o Aikupito; o le mala muamua lena na o’o ia Aikupito ona ua lē faia le manao o le Atua.

TUSI FAITAU: Esoto 7:19-24 (mo le faiaoga)
Esoto 7:20e (mo le vasega)

“ua ia sii i luga foi le tootoo, ma ta le vai o le vaitafe i luma o Farao ma ana auauna; ona liu toto ai lea o le vai uma lava o le vaitafe.”

FESOASOANI MO FAIAOGA:

O le tala lenei tamaiti o le amataga lea o mala e sefulu na tuu e le Atua ia Aikupito ona o le lē usitai i le manao o le Atua. Tele tausaga na nonofo ai le nuu o le Atua i Aikupito i le tupu lea o Farao. Sa nonofo le nuu o le Atua i Aikupito ma auauna ia Farao ma ua tigaina lava le nuu.

Na faalogo le Atua i le tagi a le nuu ona o Farao. Ona ia tofofi lea o Mose ma Arona e o e aveese mai lona nuu mai ia Farao. E lē faigofie ia Farao le manao o le Atua; na ia musu lava e tu’u Isaraelu e o e tapuai i le Atua. Na faailoa foi e Mose ma Arona ia Farao le iuga e oo i ai Aikupito ona o le lē usitai i le Atua, ae e le’i suia ai lava le loto o Farao.

O le mala muamua la lenei o mala e sefulu na o’o ia Aikupito; o le liu toto o le vai. Na faasino e le Atua ia Arona ma Mose le mea e fai ina ia liu toto ai le vai. Na tuu e Arona le tootoo o Mose i totonu o le vaitafe ona sui ai lea o le lanu o le vai; ua lanu mūmū pei o le toto. E oo lava foi i vai uma o Aikupito ua lanu mūmū uma, ona o le malosi o le Atua. Ua lē mafai ai e Aikupito ona feinu. O le faasalaga muamua lena na o’o ia Aikupito ona o le lē usitai i le manao o le Atua.

Ioe tamaiti, e pule le Atua i mea uma na ia faia; o vai, o manu, o le oneone o le sami, o le sami ma mea uma lava e oo lava i o tatou loto, e pule ai le Atua. Ia tatou faalogo i le Atua e manuia ai o tatou olaga ma alofa mai ai o Ia ia i tatou.

UIGA O UPU:

Mala – faasalaga / puapuaga e oo i le tagata lē usitai.

GALUEGA FAATINO:

1. Faatino e Faiaoga le Tala mo le vasega.
2. Valivaliga Ata: Fai ni kopi o ata ua saunia e galulue ai le vasega.

PESE:

E lelei, e lelei,
E lelei tele le Atua
E lelei tele le Atua
E leoleo ia i taua
E pei o Israelu a o i le vaomatua

Farao tuu mai Lo’u nuu sei o matou o
E osi ai taulaga i le Atua i le vao
E leai o se salamo
E musu lava o Farao
Aapa Mose fai le vavega i le tootoo

A’OA’OGA:

1. Faalogo i le Atua e manuia ai.
2. E iu leaga le tagata lē usitai.

TATALO:

Ia saunia e lau susuga i le faiaoga se tatalo e fauma ai le mataupu.

ATA: LIU TOTO LE VAI O AIKUPITO



ASO SA: 11 AOKUSO 2019

MATAUPU: UA VAVAO E IESU LE MATAGI (ASO SA TAMĀ)

SINI: Ia a’oa’oina le fanau ia malamalama ma manatua pea, na vavao e Iesu le matagi.

TUSI FAITAU: Mareko 4:35-41 (mo le faiaoga)
Mareko 4:39 (mo le vasega)

“Ona tulai lea o ia, ma na vavao atu i le matagi, ua fetalai atu foi i le vai; “Faalologo ia, ina malū ia. Ona mate lea o le matagi i le ua matuā malū.”

FESOASOANI MO FAIAOGA:

Sa i ai Iesu ma ona soo i luga o le vaa i le vai i Kalilaia ma fa’auau ai ona a’oa’o i le motu o tagata. Na fai atu foi Iesu i ona soo ina ia tu’utu’u le vaa i le isi itu ma o’o atu ai lava i tai i le mea loloto. Ua alu ifo Iesu ua moe i le pito i tua o le vaa.

Na faateia le au-soo i le agi mai o le matagi ma ua agi malosi. Ua sau le savili ma ua mamafa timuga ua tumu ai le vaa i le vai. Ona fefefe ai lea o tagata uma sa i le vaa, ae o lo’o moe pea Iesu i le pito i tua o le vaa.

Ua fafagu e le tasi soo auā ua malosi tele le matagi. E le’i toe moe Iesu a ua tu i luga ua taofi i le matagi. Ua iloa lelei e Iesu le fefefe o le au-soo, ona fai atu lea i ona soo, “se a le mea tou te fefefe ai? O lona uiga e lē tatau ona fefefe i latou ona o loo i ai faatasi ma Iesu. E lē mafai ona moe pea o Ia ao agi malosi le matagi; aua o Ia o se tamā alofa. O le tamā alofa e lē mafai ona moe ao manaomia e tagata le fesoasoani.

O se faamanatu tāua foi lea mo tatou le fanau i lenei Aso Sa o Tama. Ia amio lelei ma fai uma feau e manao ai tamā aua o iina e iloa ai lou alofa i lou tamā. O tatou tamā e alolofa ma le faamaoni ia i tatou le fanau, ia tatou taumafai e faafiafia tamā i lō latou aso faapitoa lenei.

GALUEGA FAATINO:

ALOFAAGA MO TAMA :

1. Saunia e lau susuga i le faiaoga ni pepa A4
2. Vaelua le pepa ina ia maua ai ni pepa se lua
3. Gagau lua laia o pepa nei e lua ia maua ai ni card se lua
4. Tusi i le pito i luma o le card. MO _____ LO’U TAMĀ
5. Saunia ni peni vali e faaoga e fanau
6. Pule le fanau i ni faaupuga poo ni ata e tusi i totonu o le card
7. Ia fesoasoani faiaoga i le galuega faatino a le fanau

PESE

A i ai Iesu i lo'u vaa
Ou te ata i le afā x3
A i ai Iesu i lo'u vaa
Ou te ata i le afā
Sei o'o i lo'u aigā

Folau, folau i le vasa x2
A i ai Iesu i lo'u vaa
Ou te ata i le afā
Se ia o'o i lo'u aigā

With Christ in my vessel
I would smile at the storm
Smile at the storm x2
With Christ in my vessel
I would smile at the storm
Until He takes me home

Sailing, sailing homex2
With Christ in my vessel
I would smile at the storm
Until He takes me home

A'OA'OGA:

1. Ua taofi e Iesu le matagi.
2. E alofa Iesu i ana uo.
3. Faataitai i amio a Iesu.

TATALO:

Le Atua lo matou tamā i le lagi. Faafetai tele mo le feau o lenei taeao. Ua matou iloa atili ai, ma mautinoa atili ai, e te lē tuua lava i matou i taimi faigata o lo matou ola. Faamanuia i faiaoga, faamanuia i tamaiti ona o Iesu Keriso le uo a tamaiti ua tatalo ai. AMENE

ATA: UA VAVAO E IESU LE MATAGI



ASO SA: 18 AOKUSO 2019

MATAUPU: UA TOE OLA IVI MAMAGO

SINI: Ia a'oa'oina le fanau ia manatua pea e leai lava se tasi i le lalolagi e mafai ona ia toe faaola ivi ua mamago ua nā o le Atua.

TUSI FAITAU: Esekielu 37:1-14 (mo le faiaoga)
Esekielu 37:13 (mo le vasega)

“Lo'u nuu e, tou te iloa o a'u lava o le Alii, pe a ou lagaina o outou tuugamau, ma avae outou ai o outou tuugamau.”

FESOASOANI MO FAIAOGA:

O le tala lenei i le fa'aaliga poo se vaaiga uiga ese na iloa e Esekielu le auauna a le Atua. Na faamatala e Esekielu le ave o ia e le Atua i totonu o le ana ma faa-matamata i ivi o tagata maliliu ua mamago.

Na faatonu e le Atua Esekielu ina ia tautala i ivi mamago e faalogo, o loo fetalai mai le Alii, ma ia toe ola mai. Ona tautala atu lea o Esekielu e tusa ona faatonu mai e le Atua. O se mea uiga ese ua vaai i ai Esekielu, auā ua gaoioi ivi. Ua fesootai uma ponaivi o le tino ma ua soo uma aano ma pau, ma ua foliga mai i tagata ola; peitai e le'i i ai se ola.

Ona fa'aagi mai lea e le Atua o le matagi mai itu uma; o lo'o aumai ai le manava ola. Ua ulu atu le manava ola i nei tino ma ua toe ola mai. Ona gaoioi mai ai lea o ia tagata uma ua toe feola. O le faaaliga lea na iloa e Esekielu, ua matuai ofo ai lava o ia.

O mea e faigata i le vaai ma le mafaufau o le tagata, e faigofie lea i le Atua. E pau lava le manao o le Atua mo tatou le fanau, o le ola talitonu ia te Ia.

GALUEGA FAATINO:

1. Faatino e faiaoga le tala mo le malamalama atili e le fanau.
2. Pese: A'o le pese ma faataitai taga e faiaoga mo le vasega.

PESE: IVI MAMAGO

Ivi nei, ivi nei, ivi ua mamago x 3
Faalogo ua fetalai le Alii
O le ulu fesootai, ma le ua
O le ua fesootai ma tauau
Tauau fesootai ma aoao
Faalogo ua fetalai le Alii
Aoao fesootai ma le manava
O le manava fesootai ma le tua

O le tua fesootai ma suilapalapa
Suilapalapa fesootai ma tulivae
Tulivae fesootai ma tamaivae
Faalogo ua fetalai le Alii

Ivi nei, ivi nei, ivi ua mamago x3
Faalogo ua fetalai le Alii

Dry Bones

African American Spiritual

E - ze-kiel cried, "Them dry bones,"E - ze-kiel cried, "Them dry bones,"E -
ze-kiel cried,"Them dry bones,"Now hear the word of the Lord. The toe bone con-nec-ted to the
heel bone,The heel bone con-nec-ted to the foot bone,The foot bone con-nec-ted to the
leg bone,The leg bone con-nec-ted to the knee bone,The knee bone con-nec-ted to the
thigh bone,The thigh bone con-nec-ted to the back bone,The back bone con-nec-ted to the
neck bone,The neck bone con-nec-ted to the head bone,Oh, hear the word of the Lord! Them
bones,them bones,gon na walk a-round,Them bones,them bones,gon na walk a-round,Them
bones,them bones, gon - na walk a-round, Oh, hear the word of the Lord!

A'OA'OGA:

1. Ua toe ola ivi ua mamago.
2. E usitai Esekielu i le Atua.
3. E leai se mea e faigata i le Atua.

TATALO: Faafetai le Atua i lou a'oa'o a mai i lenei taeao. Ua uma la matou aoga ma le ma'utinoa e leai, leai lava se mea e faigata i Lau Afio. Ua a'oa'o mai foi ma faamanatu mai pea ia i matou, ia matou talitonu ma le faamaoni i lau Afio i aso uma o lo matou ola. AMENE

ATA: ESEKIELU MA IVI MAMAGO



ASO SA: 25 AOKUSO 2019

MATAUPU: UA LĒ FUA LE MATI

SINI: Ia a’oa’oina le fanau ia malamalama ua mafua ona lē toe aina fua o le mati ona sa fetalai i ai Iesu.

TUSI FAITAU: Mareko 11:12-14 (mo le vasega)
Mareko 11:14 (mo le faiaoga)

“Aua le toe ‘aina lava e se tagata sina ou fua e oo i le faavavau.”

FESOASOANI MO FAIAOGA:

O le laau leni o le mati e tele lava i le atunuu nei o Palesitina. O se laau e aina ona fua, o se laau foi e maitauina lava le ola i autafa o auala o Palesitina. O se laau tupu tele ma e ‘aina ona fua, e suamalie foi.

Lea faatoa uma lava ona faamalolo e Iesu tauaso ma pipili i le malumalu, ona alu ese ai lea o ia. Ua Ia ui atu i tua o le aai ma alu atu ai i le nuu lea o Petania, ua malolo ai ma ona soo aua ua pogisa. Ua malama le taeao ma ua lagona e Iesu lona fia ai. Sa i ai le laau leni o le mati i le auala; na latou o atu i ai peitai e le’i fua le mati. Ona faanoanoa ai lea o Iesu ma ua ia fai atu i le mati e lē toe ‘aina lava ona fua e oo i le faavavau. Na amata mai ai lava i le aso lea ona lē toe suamalie fua o le mati aua na fetalai i ai Iesu.

O se a’oa’oga tāua foi lea mo tatou le fanau, ia tatou tausī lelei i laau. Ia tatou tausī ma faamatagofie laau ina ia fua mai ma aulelei ma ia fua mai i taimi uma. A oo ina lē fua lelei le laau ma le toe aina ona fua ona tuu lea i lalo.

GALUEGA FAATINO :

1. Ia kopi le ata o le laau lea i le pepa lapoa.
2. Tusi igoa o vaega o le laau i nisi pepa ma oti i le seleulu, ona tuu lea i le fanau e faapipii i vaega e tataua ona i ai.

PESE: Jesus wants me for a sunbeam (fati)

Jesus wants me for a sunbeam
To shine for him each day
And in every way trying to please Him
At home, at school, at play

A sunbeam, a sunbeam
Jesus wants me for a sunbeam
A sunbeam, a sunbeam
I’ll be a sunbeam for Him

A'OA'OGA:

1. Ua lē 'aina fua o le mati.
2. Ia tausi lelei laau ina ia fua mai ma matagofie.
3. E pule le Atua i laau.

TATALO:


Faafetai tele le Atua lo matou Tamā, o Oe lava e pule i laau na e faia. Faamagalo i matou auā ua matou lē tausi lelei i laau ua e aumai. A'oa'o i matou ia matou fiafia e vaai faalelei laau ina ia fua mai i taimi uma ma ia matagofie. AMENE.

ATA: UA LĒ FUA LE MATI





the
Fig Tree



MANATU TAIALA O SETEMA: IA FA'AA'OA'O I LE AMIO LELEI

Ua filifilia le manatu taiala mo lenei masina ma le faamoemoe ina ia toe faamanatu i le fanau le amio e tatau mo le tama ma le teine aoga. O mataupu uma foi ua filifilia o loo atagia ai le a'oa'o mai o lo tatou Alii Faaola i amio lelei.

ASO SA: 1 SETEMA 2019

MATAUPU: UA FAIA PAPA MA'A E LUA

SINI: Ia a'oa'oina le fanau ia malamalama i le tāua o Papa Maa na tuuina e le Atua ia Mose lana auauna.

TUSI FAITAU: Esoto 31:12-18/32:15-16 (mo le faiaoga)
Esoto 31:18e (mo le vasega)

“ona avatu ai lea e ia ia te ia o papa maa e lua o le tulafono, o papa maa lava na tusia e le aao o le Atua.”

FESOASOANI MO FAIAOGA:

E lua papa maa na tuuina e le Atua ia Mose i luga o le mauga o Sinai. O papa maa nei, o tulafono a le Atua ua vaneina i le papa. O papa maa nei e tai foliga i maa faamanatu o loo i luga o tuugamau pei ona tatou vaaia i nei aso. Peitai o papa maa ia na aumaia e Mose mai i le mauga, na tusia lava i le aao o le Atua. E lua papa maa na alu ifo ma Mose i le mauga, ma o paa maa uma nei e lua o loo tusia ai tulafono e sefulu a le Atua.

O le Atua lava ia o le Atua e alofa i lona nuu o Isaraelu. Na taitai mai lava e le Atua lona nuu mai Aikupito ma Ia faasino ia Mose le ala e savavali ai, ina ia taunuu i le nuu folafolaina.

O le isi lea vaega na iloa ai lona alofa tele i lona nuu o Isaraelu, o papa maa nei e lua. Na ia finagalo ia aua lava nei galo i le tagata Lona alofa. O tulafono o le faamanatu mo i latou e i ai pea o Ia i le tagata, i aso uma ma taimi uma o le ola.

O tulafono nei lea ua tusia i le Tusi Paia lea ua a'oa'oina ai i tatou. O lea ua tatou taulotoina mai lava i le taimi lenei se ia oo lava ina matutua i tatou. O tulafono nei e a'oa'o mai ai le amio lelei ma le amio e tatau ona faia e le tagata e alofa i le Atua. Na tuuina mai papa maa nei e lua ia Mose mo le faamoemoe ia a'oa'o ai tagata Isaraelu. Lenei foi ua a'oa'oina i tatou ia tatou iloa ma savavali ai e lelei ai tatou.

GALUEGA FAATINO:

Fesili ma Tali

1. O ai le igoa o le tamaloa lea na alu i le mauga e aumai Papa Maa?
O Mose

2. O ai le igoa o le Mauga?
O Sinai
3. O a mea o loo tusia i le Papa Maa
O Tulafono a le Atua.
4. E fia le aofai o papa maa?
E lua.
5. E fia tulafono?
E sefulu.

PESE: O le alofa o le Atua

O le alofa o le Atua
Pei o se li'o tele
E taamilo lava
Leai se mutaaga

O le alofa o le Atua
E fai pea e lē gata
E alofa mai o Ia
I aso uma lava


A'OA'OGA:

1. O Papa maa, o tulafono a le Atua.
2. E alofa le Atua i lona nuu
3. Faalogo i le Atua.

TATALO:

Le Atua e lo matou tamā, faafetai i tulafono ua e aumai e faatonutonu ai la matou amio.
AMENE.

ATA: MOSE MA PAPA MAA E LUA O TULAFONO



ASO SA: 8 SETEMA 2019

MATAUPU: UA AVE SAMUELU IA ELI LE OSITaulAGA

SINI: Ia a’oa’oina le vasega ia malamalama na ave Samuelu ia Eli ina ia a’oa’oina ai i ala o le Atua.

TUSI FAITAU: 1 Samuelu 1:1-28 (mo le faiaoga)
1 Samuelu 1:28 (mo le vasega)

“O a’u foi ua ou tuuina atu o ia i le Alii; ua tuuina atu o ia i le Alii i aso uma e ola ai o ia; ona ifo ai lea o ia i le Alii i lea mea.”

FESOASOANI MO FAIAOGA:

O le tama lenei o Samuelu; o lona tamā o Elekana a’o lona tina o Hana. O le uiga o le igoa o Samuelu, *“ua faafogaina e le Atua.”* Na mafua ona maua le igoa o Samuelu ona sa tatalo lona tina o Hana i le Atua, ina ia foai se pepe mo ia ma o le tama la lenei o Samuelu.

Na oo i le taimi ua te’a Samuelu ma le susu ma ua malosi, ona alu loa lea o Hana ua ave Samuelu ia Eli le ositaulaga. O le tautoga lea a Hana na fai i le Atua ma na ia tausilava i ai. Ua ia tapena foi o povi, falaoa ma le uaina ma tapena foi ma Samuelu ao laititi lava o ia; ma tuuina atu loa ia Eli le ositaulaga.

Ua nofo Samuelu ia Eli ma ua a’oa’oina i ala o le Atua; auā o Eli o le auauna a le Atua e galue o ia i le falesa i aso uma. E alu lava la Eli ma ave Samuelu i le falesa, ma vaai ai ma faalogo ai i tala i le Atua ma tupu ai lava lona fiafia i le Atua. Ua ia fesoasoani foi ia Eli i feau e manaomia e Eli. O iina na a’oa’oina ai Samuelu i le amio lelei ma le amio e tataua e fiafia ai le Atua.

O le feau o lenei tala tamaiti, a e fiafia e te alu i le fale o le Alii ma soo se fale e a’oa’o ai mataupu a le Alii, e tupu ai lou fiafia i le Alii. A tupu lou fiafia i le Alii, e a’oa’oina ai foi oe i le amio lelei e fiafia ai le Alii.

GALUEGA FAATINO:

Fesili ma Tali.

1. O ai matua o Samelu?
Hana ma Elekana
2. O le ā le uiga o le igoa o Samuelu?
Ua faafogaina e le Atua.
3. Aisea na ave ai Samuelu ia Eli?
Na tauto Hana i le Atua ma na ave e fai feau a Eli ma a’oa’oina ai i amio lelei e fiafia ai le Atua.

Valivaliga Ata:

Fai ni kopi o ata ua saunia e galulue ai le vasega.

PESE: “SAU TA Ō MA A’U”

Sau ta o ma a’u

I le fale o lo’u tamā x3

Sau ta o ma a’u

I le fale o lo’u tamā

O lo’o iai le olioli, olioli

Come and go with me

To my fathers house x3

Come and go with me

To my fathers house

And Rejoice, Rejoice, Rejoice

A’OA’OGA:

1. Ia fiafia i le Atua.
2. O le amio lelei e maua i le Atua.
3. Ia pei o Samelu le amio lelei.

TATALO:

Le Atua lo matou Tamā faafetai ua uma la matou aoga i lenei Aso Sa. O le a sauni i matou mo le lotu, faafetai mo le mataupu ua toe faamanatu mai ai ia i matou, ia matou fiafia pea e o i le falesa i Aso Sa uma ma aso e fai ai lotu, matou te popoto ai. AMENE.

ATA: UA AVE SAMUELU IA ELI LE OSITAULAGA



ASO SA: 15 SETEMA 2019

MATAUPU: UA TOE OLA LE TAMA NA OTI

SINI: Ia a'oa'oina le fanau ia malamalama na toe faaola e Iesu le tama na oti.

TUSI FAITAU: Luka 7:11-17 (mo le faiaoga)
Luka 7:15 (mo le vasega)

“Ona nofo ai lea i luga o le tama na oti, ua tautala; ona ia tuuina atu lea o ia i lona tinā.”

FESOASOANI MO FAIAOGA:

O Iesu lava ia e alofa o lona faamoemoe na i ai i le lalolagi, o le faaola o tagata. E tele vavega ma faamalologa na ia faia mo tagata pipili, tauaso ma tagata sa manaomia le fesoasoani. O le tasi lea o faamalologa a Iesu na faia i le taimi o lana galuega fesoasoani.

A o i ai Iesu ma ona soo i le nuu poo le aai lea o Naina, sa o'ifo ai tagata ia te ia ma le fata. O le fata lenesi o lo'o i ai le tamaititi ua oti. E na'o le tasi lava le tama a le fafine lenesi ma ua oti foi si ona toalua. Na silasila atu Iesu i le tama, ona tupu ai lea o lona alofa tele ia te ia. Ua pa'i atu Iesu i le fata ma fai atu i le tama... “le taulealea e, ou te fai atu ia te oe, Ina tulai ia.” Ona nofo mai ai lea i luga o le tama ma ua tautala mai o ia ua toe ola.

Ua ofo tagata uma sa i ai i lea aso ona o le vavega ua faia e Iesu. Ua latou vivii ma faafetai i le Atua. Ua latou faapea mai foi, ua oo mai ia i latou le perofeta sili, ua asiasi mai le Atua i lo latou nuu.

UIGA O UPU:

1. Naina: silasila i le faafanua o Palesitina i le Feagaiga Fou i tua o le Tusi Paia.

GALUEGA FAATINO:

1. Faatino le Tala: Faatino e faiaoga le tala mo le malamalama atili o le fanau.
2. Valivaliga Ata: Ia fai ni kopi o ata ua saunia e galulue ai le vasega.

He's able, he's able

I know He is able

I know my Lord is able

To carry us through

He makes the lame to walk again

And set the blinds to see

That's why He's able, He's able

I know He is able

I know my Lord is able to carry us through

He heals the broken hearted

And set the captives free

O le Atua na te mafaia
Ua ou iloa o ia e mafaia
Ua ou iloa e mafai e le Alii
Ona fesoasoani mai

Filemu e loto mafatia
Saoloto e saisaitia
O pipili ua savavali fiafia
Tauaso ua vivii ia te ia.


A'OA'OGA:

1. E alofa Iesu i tamaiti.
2. Ua toe ola le tama na oti.
3. Ia vivii ma faafetai i le Atua.

TATALO:

Saunia e lau susuga i le faiaoga se tatalo e faauma ai Mataupu o Ienei Aso Sa.

ATA: UA TOE OLALA LE TAMA NA OTI



ASO SA: 22 SETEMA 2018

MATAUPU: UA LĒ AGASALA IOPU

SINI: Ia a’oa’oina le vasega ia malamalama o Iopu o se tamā e faamaoni i le Atua.

TUSI FAITAU: Iopu 2:1-10 (mo le faiaoga)
Iopu 2: 10e (mo le vasega)

“Ua lē agasala Iopu i nei mea uma i ona laugutu.”

FESOASOANI MO FAIAOGA:

Sa i le nuu lea o Usa le tasi tamā e Igoa ia Iopu. O se tamaloa mauoloa tele, e toasefulu lana fanau e fitu tama ae tolu teine. E tele a latou lafumanu ma tele fanua e galulue ai, e leai foi se mea e tasi e popole ai Iopu auā e mauoloa lona aiga. Sa lelei mea uma i le aiga, peitai na o’o puapuaga ia Iopu ma lona aiga ma ua lē toe tutusa ai le latou mafutaga. Na papala le tino atoa o Iopu, e amata mai lona tumua’i e o’o i ona alofivae.

Sa aveesea uma ana faatoaga ma lafumanu, ae sili ona tigā, ua feoti uma lana fanau. Na onosai pea Iopu i mea uma ua tupu ia te ia ma lona aiga. E le’i lava le onosai o le toalua o Iopu, na ia faaosooso Iopu e faifai i le Atua ona o nei mea uma. Peitai o Iopu lava na tumau pea i le onosai ma le faatuatua i le Atua. Na mautinoa lava e Iopu e alofa pea le Atua ia te ia. E mautinoa foi e Iopu o ia e leai lava sana agasala; ae e tutupu pea puapuaga i soo se tagata.

Na toe faamanuia le Atua ia Iopu ma lona aiga. Ua sili atu ona tele oloa ua foai i ai e le Atua nai loo le mea sa i ai muamua. O manuia na ua toe foai i ai e le Atua, ona o lona tumau ia te Ia ma le faamaoni.

GALUEGA FAATINO:

Fesili ma Tali :

1. O fea le nuu e sau ai Iopu?
Usa
2. E toafia le fanau a Iopu?
E toasefulu.
3. O le ā le malaia na o’o ia Iopu?
Feoti lana fanau, aveesea faatoaga ma manu, papala lona tino atoa.
4. E i ai se agasala a Iopu?
Leai.

PESE:

Iesu le uo a tamaiti
Uo a tamaiti, uo a tamaiti
Iesu le uo a tamaiti
Ioe, Ioe e moni

Satani o le fili o tamaiti
Le fili o tamaiti, fili o tamaiti
Satani o le fili o tamaiti
Ioe, Ioe e moni


A'OA'OGA:

1. Ia faamaoni i le Atua
2. E alofa le Atua ia Iopu.

TATALO:

Faafetai le Atua mo le mataupu i lenei taeao, ua matou iloa atili ai e te alofa pea ia i matou lau fanau. AMENE

ATA: IOPU



ASO SA: 29 SETEMA 2019

MATAUPU: UA Ū PAULO E LE GATA UOGO

SINI: Ia a’oa’oina le fanau ia iloa, na ū Paulo e le gata ae le’i oti ai.

TUSI FAITAU: Galuega 28:1-6 (mo le faiaoga)
Galuega 28:3e (mo le vasega)

“ona sau ai lea o le gata uogo ona o le vevela, ma pipii i lona lima.”

FESOASOANI MO FAIAOGA:

O Paulo o lona igoa muamua o Saulo, o ia o se tagata sa leaga muamua lona olaga. Na faasauā i tagata Kerisiano peitai na toe suia lona olaga ina ua taia i le malamalama o le Atua i le ala i Tamaseko. Sa filifilia ai loa o ia e le Atua e avea ma ana auauna ma ua suia ai lona igoa ia Paulo. O iina na amata ai loa ona alu malaga Paulo i isi atunuu tuaoi e talai le tala lelei ia Iesu.

O le tasi o ana malaga na alu agai i Roma na iu ane ai i le motu lea e igoa o Melita. Na malolo ai iina ma ua agalelei i ai tagata o le motu. Ua latou tafu le afi e faamafanafana ai Paulo ma lana aumalaga auā ua tetele lava le malulu. Na faateia tagata i le vaai atu i le gata uogo o loo pipii i le lima o Paulo ua ū. Ua lata mai le gata uogo lea i le mea o loo nonofo ai, ona o le mafanafana manaia o le afi.

O le gata lenei o le gata feai tele, a ū ai le tagata e mautinoa lava ua oti. Peitai o se mea uiga ese lea i le vaai a tagata i lea po, o le leai o se suiga i foliga o Paulo ina ua uma ona ū e le gata. Na ona tago ane lava o Paulo ua lūlū le gata i le afi ma pe ai, ae o loo malosi atoatoa, e leai ma se fulafula ma se tigā o lona lima. Ua taufaiifo uma tagata i lena po ma latou fai ane, e pei lava Paulo o se Atua.

Leai o Paulo e lē o se Atua, peitai o ia o le auauna a le Atua na auina e faia le fingalo o le Atua. Soo se tagata lava e faia le finagalo o le Atua, e leoleo ma puipui e le Atua i soo se mea e alu i ai.

GALUEGA FAATINO:

1. Valivaliga Ata: Ia fai ni kopi o ata ua saunia e galulue ai le vasega.

PESE:

O le Atua e tele, e malosi ofoofogia
E leai se mea e le mafai ona Ia faia
Na Ia faia o atumauga
Na ia faia o vaitafe

Ona foliga ua vaaia i le lalolagi HA! HA!

My God is so big, so strong and so mighty
There's nothing my God cannot do,
The mountains are His
The rivers are His
The whole world is under his smile...HA HA

A'OA'OGA:

1. E alofa le Atua i ana auauna.
2. E puipui i tatou e le Atua i aso uma.
3. Ia faaeteete i manu feai.

TATALO:

Le Atua e lo matou tamā, faafetai mo le mataupu ua a'oa'o ai i matou i lenei taeao.
Faamanuia i faiaoga ma tamaiti, ona o Iesu le uo a tamaiti ua matou tatalo ai. Amene.

ATA: UA Ū PAULO E LE GATA UOGO



ATA: UA Û PAULO E LE GATA UOGO.



MANATU TAIALA O OKETOPA MA NOVEMA: ALOFA MA LOTO MAULALO

O le alofa ma le loto maulalo, o le ogatotonu lava lea o mea lelei uma o le olaga nei. E tupu le lotomaulalo i le alofa, e tupu foi le alofa i le lotomaulalo.

ASO SA: 13 OKETOPA 2019

MATAUPU: UA FAASAOINA E TAVITA SAULO I LE ANA O ENOKATI

TUSI FAITAU: 1 Samuelu 24:1-22

TALA MO TAMAITI

FAAMATALA: O le tala leni i le faasaoina o Saulo e aTavita i le ana i Enokati. Usi lau silasila ma lau faafofoga.

SAULO: (faatinoga: Avaavau ma fealualuai, ua manaomia se fesoasoani)
O ai ea leni uli mate ua na faapologa i lou mafaufau.
Tavita! Tavita! Soo se avanoa ou te maua ai oe, e te vaavaai i ai Isa!
Tainoino e!

AUAUNA 1: Saulo e, le tupu afio maia e ai sau malologa ua leva foi le po.

AUAUNA 2: Aua e te popole e te maua lava si alii lena.

AUAUNA 3: Saulo o le a ea le mea ua faigata ai ona oo mai Tavita i ou luma.

SAULO: O le faalavelave, e i ai le tagata la e tau'a ia Tavita au fuafauga uma.
Se na o tagata leaga, o ia i fafo ua tigā ou mata.

FALETUA: Ave ese ia lena mataupu ma lou mafaufau ma lou ma'i, tuu le tagata ia e fai lona faitalia.

SAULO: Tuu aua, aua lava nei ou toe faalogo is au faamatalaga. O oe le isi mafuaaga o le faaumiumi o le mataupu leni fafine leaga.

AUAUNA: Lau afioga e, e leo toe maua lava lou fili i se nofoaga faapenei.

SAULO: Ae maua ifea? Ua alu i le lagi leni tamaititi laulalago. Ae ua faafiufiu mai.

AUAUNA: O le vanu lena; na ma talanoa ai ma le isi au, fai mai o loo nofo ai Tavita ma lana autau.
SAUNI! Faapotopoto le nuu aua lava nei i ai se tagata e toe nofo i le aai. Sei iloilo atu lava le auro i le afi.

FAAMATALA: Ua malaga atu Saulo ma lona nuu. Ua taunuu i le vanu, ua siomia atoa le ana, Tavita ma ana au, o loo i le muli ana. Ua malama le taeao o lo’o moe gase Saulo faapena le nuu i le vaivai i le mamao ona sau ai lea o Tavita ua sesele le pito ofu o le ofu o Saulo. Usi pea le silasila ma le faafofoga.

TAGATA 1: Ō, ma leo lemū e fagufagu ai Tavita....Tavita! Tavita, ua moe gapēpē lava le tupu faapea ana au uma.

TAGATA 2: O lou avanoa lelei lava lea, alu loa e fasioti.

TAGATA 3: Tavita o lou avanoa lelei lava lenei ua tuumai e le Atua, le naifi lea.

TAGATA 4: Lo’u matai tuu mai ia te au out e alu atu i ai ae malolo oe.

TAVITA: Ou uso e, Ia faamamao ia te au ona ou faia o lena mea i le tagata ua faauuina e le Atua mo ia, na o Ia lava.

FAAMATALA: Ua tototolo mai Tavita o lo’o moe gapēpē lava Saulo faapea ma tagata na latou omai. Ua vaai atu Tavita i le moe a Saulo, ua alofa tele i ai. Ua na seseleina se pito o lona ofu ona alu lea ma ia. Ua tu mai foi i le mauga ua faapea mai.

TAVITA: Saulo, Saulo e, Aisea ua le mataala ai au auauna i le leoleoina o lau afioga. Vaai mai i le pito o lou ofu lea ou te u’uina atu. Saulo; na fautua mai isi ou uso o le avanoa lea out e fasiotia ai oe. Ae na ou fai i ai, ou te le mafai ona ou fasiotia le tagata ua faauuina e le Atua. Saulo ua sili lo’u alofa ia te oe, nai loo le alofa o au auauna.

SAULO: Tavita lo’u atalii, ua ou talitonu o oe lava o le tagata lelei, ina ua e faasao lou ola, ae tipi ese na o le pito o lou ofu.
Tavita, faamagalo mai au, ia faamanuia foi le Atua i lou olaga.

A’OA’OGA:

1. Matua, o le tala lena o loo faailoa ai le tamā alofa poo le tamā faamaoni, tamā manao tele ma le faamaualuga ae lē mafaia se mea.
2. Ioe matua o i ai ea se tamā poo se tina faapena i lenei aofia, alo ese ia i uiga faasausili ma le loto matau’a.
3. Ioe, e lelei lava le fia sili, ae ia faamaoni ma amiotonu.
4. O lou sapi i faamanuiaga, o loo faamasino pea e le Atua lau faatinoga. O le tu’ualalo, ia faamuamua le alofa o le mea lea.

IA SOIFUA MA IA MANUIA.

ASO SA: 20 OKETOPA 2019

MATAUPU: UA TULI ESE IEFATA MAI LONA AIGA

SINI: Ia a’oa’o tamaiti i le mafuaaga na tuli ese ai Iefata mai lona aiga.

TUSI FAITAU: Faamasino 11:1-10 (mo le faiaoga)
Faamasino 11:2 (mo le vasega)

“E te lē maua se tofi i le aiga o lo matou tamā, auā o oe le tama a le fafine ese.”

FESOASOANI MO FAIAOGA:

O Iefata o le atalii o Kiliata e ese lona tina ina ua toe fai le isi toalua o Kiliata. O uso la o Iefata ia e toalua lea e eseese o latou tinā, lea na faia le tonu ina ia tuli ese Iefata mai lo latou aiga aua e ese lona tina. O Iefata foi ua matua ma ua malosi ae ua faateia i le ō atu o ona uso ua fai atu ia alu ese vave aua o ia o le tama a le fafine ese, e leai foi sona tofi i lo latou aiga.

E ui o Iefata o se toa, ae na ia maua lava le loto maulalo ma ia alu ese gūgū ai lava. Ua alu atu ma nofo i Topa, a’o i ai Iefata i Topa na sauni ai le taua a Amoni ma Isaraelu. O le mea ua tupu, ua vevesi solo mafaufau o le nuu i se tagata e ta’ita’i le itu tau a Isaraelu. Na tonu ai lea i toeaiina na latou tulia Iefata, ia toe aami Iefata e fai ma ta’ita’i ia i latou. Ua alu le sāvali ia Iefata ma ua faapea atu, ia sau e ta’ita’i la latou au i le taua ma Amoni. Ua fai atu Iefata, “tou te le’i tuli esea ea au ma fai mai o le tagata ese?” Ona faatoese ai lava lea o toeaiina o le nuu ia Iefata. Na talia lelei e Iefata toeaiina ma ua sauni loa mo le faataunuuna o le taua.

GALUEGA FAATINO:

A. Fesili ma Tali

1. O ai le igoa o le tama o lo’o ta’u mai i le tala?
Iefata
2. Aisea na tuli ese ai Iefata mai lona aiga?
Na ita i ai ona uso aua e eseese o latou tinā.
3. O ai le igoa o le tamā o Iefata?
O Kiliata.

E. Valivaliga Ata.

Fai ni kopi o ata ua saunia e galulue ai le vasega.

PESE: fati (lo’u moega i le papa)

O le alofa ma le lotomaulalo

E maua ai le loto faamagalo
Tamaiti omai
Tatou fiafia
Osana ma Aleluia

A'OA'OGA:

1. O le loto maulalo e faeaina.
2. Ia maua le onosai.
3. Ia loto maulalo pei o Iefata.

TATALO:

Ia saunia e lau susuga i le faiaoga se tatalo e fauma ai le mataupu.

ATA: UA TULI ESE IEFATA MAI LONA AIGA



ASO SA: 27 OKETOPA 2019

MATAUPU: UA FASIA E SAMASONI LE LEONA

SINI: Ia a’oa’o tamaiti i le malosi o Samasoni. Na ia fasia ai le leona pei se tamai oti.

TUSI FAITAU: Faamasino 14:5-7 (mo le faiaoga)
Faamasino 14:6 (mo le vasega)

“Ona osofia lea o ia e le Agaga o le Alii, ua na saeia le leona, e pei ona saeia se tamai ‘oti,”

FESOASOANI MO FAIAOGA:

O Samasoni o le atalii o le tagata e igoa ia Manoa, mai Soraa i le ituaiga o Tanu. Na faaali le agelu i lona tina ao lei fanau o ia o le a ia fanaua se tama e lē o’o se tafi i lona ulu. O le tama foi lenei e avea ma naseri i le Atua, e amata mai lava e le aso e fanau mai ai.

Ua tuputupu ae Samasoni ma faatuputeleina lona malosi ma o lona malosi lenei e mai lana tautoga faanaseri i le Atua. O lea tautoga e faasāina foi le inu i se uaina pe pa’i i se manu mate.

Ua oo i le isi aso ona ui ane ai lea o Samasoni ma ona matua i le tovine a Timenata. Ua tu mai foi le leona feai; ona ia fasia lea i ona lima e aunoa ma se aupega na faaaogā. E le’i faigata ia Samasoni ona fasi i le leona aua o se tama malosi tele. Ua fasi mate lava le leona e pei o loo fasi i se tamaiti oti.

GALUEGA FAATINO:

FESILI MA TALI

1. O ai le tamā o Samasoni?
O Manoa
2. O fea le nuu o le tamā o Samasoni?
O Soraa i le ituaiga o Tanu.
3. O le ā le tautoga ma faia i le Atua pe a fanau mai Samasoni?
O le tautoga Faanaseri.
4. O le ā foi le faatinoga o le tautoga?
E lē inu se uaina, ava oona, e lē foi se tafi i lona ulu.

SOLO

O Samasoni o le toa malosi

Na ia fasia le leona pei se tamai oti
Na fasi mate lavai ou lima
Ae lei iai lava sona afaina

A'OA'OGA:

1. Faamoemoe i le Atua e maua ai lou malosi.
2. Faa'aoga tatau le malosi.

TATALO:

Saunia e lau susuga se tatalo e faaiu ai le mataupu.

ATA: FASIA E SAMASONI LE LEONA



ASO SA: 3 NOVEMA 2019

MATAUPU: UA AVE E APERAAMO LE FAAMUAMUA IA LOTA

SINI: Ia a’oa’o tamaiti i le alofa faamuamua o Aperaamo ia Lota.

TUSI FAITAU: Kenese 13:5-15 (mo le faiaoga)
Kenese 13: 9 (mo le vasega)

“Afai e te alu i le itu tauagavale, ona ou alu ai lea i le itu taumatau; a ē alu i le itu taumatau, ona ou alu ai lea i le itu tauagavale.”

FESOASOANI MO FAIAOGA:

O Aperaamo o lona nuu o Uro i Kaletaia, o lona toalua o Sarai. Ua alu ae Aperaamo nai Aikupito o ia ma lana avā o ana manu foi ma ana oloa e tele. Ua alu foi ma ave Lota le atalii o lona uso i lana malaga. Ua tele foi manu a Lota o le mafuaaga foi lea na tauaimisa soo ai a la tausi manu, ona o le laititi o le vao ma le vai.

Ua alu pea le malaga, ua oo atu i le eleele o Ioritana ona fai atu lea o Aperaamo ia Lota. Vaavaai atu ia i le laueleele o i ou luma pe ete manao i ai, afai foi e te fia alu i le itu tauagavale, ona ou alu ai lea i le itu taumatau; afai foi e te filifili i le itu taumatau ona ou alu ai lea i le itu tauagavale.

Ua vaai atu Lota i le lafulemu o le laufanua, o le eleele o Ioritana ona ia filifilia ai lea. Ua mautū le nofoaga o Lota ma ana manu ona alu ai lea o Aperaamo ua nofo i Kanana. Ua faamanuia ai foi le Atua.

GALUEGA FAATINO:

A. Fesili ma Tali

1. O ai foi le nuu o Aperaamo? _ *Tali: Uro i Kaletaia*
2. O ai Lota? _ *Tali: O le atalii o le uso o Aperaamo.*
3. O ai foi le toalua o Aperaamo? _ *Tali: O Sarai le toalua o Aperaamo.*
4. _Aisea na o eseese ai Aperaamo ma Lota? _ *Tali: Ina ia aua nei toe misa*

E. Valivaliga Ata

Ia fai ni kopi o ata ua saunia e galulue ai le fanau

PESE: Ia usu e faiaoga le pese lea mo le fanau ma fai ni taga.

E manao Iesu i le fealofani
Ia mafuta ma femulumulua’i
Aua le fevaevaeai
Poo le fetuatuana’i

O le toilalo ma le maasiasi

O Iesu le atoaga

O tatou olaga

E malu au peau o le vasa

Nei mālo Satani

E iu vale le tau

O Iesu lo ta puni-matagi

A'OA'OGA:

1. Ia loto alofa faapei o Aperaamo.
2. Ia fealofani tatou uma.
3. Ave le faamuamua i le isi tagata.

TATALO FAAIU:

Saunia e lau susuga i le faiaoga se tatalo e faaiu ai le mataupu.



ASO SA: 10 NOVEMA 2019

MATAUPU: UA MULUMULU E IESU VAE O ONA SOO

SINI: Ia a’oa’o tamaiti i le loto maulalo o Iesu ma le galuega na Ia faia.

TUSI FAITAU: Ioane 13:1-11 (mo le faiaoga)
Ioane 13:5 (mo le vasega)

“Ona liligi lea e ia o le vai i le ipu e mulumulu ai, ua mulumulu i vae o ona soo, ma sōloi ai i le solo ua ia fusi ai.”

FESOASOANI MO FAIAOGA:

O le tasi lea o tala o loo manino ai le loto maulalo o Iesu. O le galuega lenei o le mulumuluina o vae, o le galuega e faia e le pologa ma le auauna. Peitai, o lea ua faatino e Iesu i ona soo; ma ua faateia i latou i lenei mea ua fai e Iesu. O se a’oa’oga mo le au soo i le ola faasausili ma le māsalosalo. Ua ta’utino e Iesu i le galuega na ia faia le auala e saili ai le manumalo. O le loto maulalo lava, o lona iuga e faaeaina.

A’o lei oo i le Tausamiga o le Paseka, ua silafia e Iesu ua o’o mai ona po e tuua ai e Ia lenei lalolagi ae toe fo’i atu i lona Tamā. O le po lea ua manatu Iesu, e ao pea ona faamatau ma faaali i le au soo le uiga tonu lava o le loto mauualalo. Ua tulai Iesu ao faia le meaai, ua i tu’u ese i ona ofu, ua aumai le apa vai ma le ie soloi. Ona punou ifo lea o Ia ua amata mulumulu i vae o ona soo. A uma ona mulumulu i le vai, ona ia tago lea i le ie soloi ua solo a’i vae. E leai lava se tasi o le au soo e le’i o’o i ai le galuega a Iesu.

O le a’oa’oga lelei foi mo le fanau; ia faata’ita’i i ala nei ua faasino mai e Iesu. Ia aua le faamaualuluga, aua le fia malosi, a ia manatua lenei faataitaiga lelei ua faia e Iesu mo i tatou. O galuega maulalo, o le auala i le faaeaina.

UIGA O UPU:

1. Mulumulu – faamamā po o le fufulu
2. Faasausili – faamaualuga
3. Masalosalo – loto eleelea
4. Faeaina – manuia le olaga

GALUEGA FAATINO:

- A. Faatino e faiaoga ma tamaiti le tala. Tapena e lau susuga i le faiaoga le apa vai ma le ie soloi ae faaoga le fanau e fai ma soo.
- E. Valivaliga Ata: fai ni kopi o ata ua saunia mo le fanau.

PESE:

Iesu loto maulalo
Iesu loto faamagalo
Tele o mea fou
Ua faia mo i tatou

Se a'oa'oga aogā
Mo fanau uma
Ia loto maulalo
Pea i lou olaga

Iesu le tali o moomooga
O le taunuuga o manaoga


A'OA'OGA:

1. Ia faataitai ia Iesu le loto maulalo.
2. E manuia le tagata e loto maulalo.

TATALO:

Ia saunia pea e lau susuga i le faiaoga se tatalo e faauma ai le aoga.

ATA: IESU O LO'O MULUMULU VAE O ONA SOO



ASO SA: 17 NOVEMA 2019

MATAUPU: UA LILIUINA LE VAI E AVEA MA UAINA.

SINI: Ia a’oa’o tamaiti i le vavega na faia e Iesu i le faaipoipoga i Kana i Kalilaia.

TUSI FAITAU: Ioane 2:1-11 (mo le faiaoga)
Ioane 2:11 (mo le vasega)

“Na faia e Iesu lenei uluai faailoga i Kana i Kalilaia,”

FESOASOANI MO FAIAOGA:

O le uluai vavega lenei na faia e Iesu i Kana i Kalilaia. Na fai le aiga tele i Kana i Kalilaia, sa i ai Iesu ma Maria lona tinā faapea ona soo atoa ai ma le toatele o tagata. Na uma le uaina, ona fai atu lea o Maria ia Iesu ua leai se uaina. Peitai na fetalai Iesu, e lei o’o i lona ituaso. Ona fai atu lea o Maria i soo o Iesu; po o le ā lava le faatonuga e fai atu e Iesu, ia outou faia lava.

Ona fetalai atu lea o Iesu ia i latou, ia faatutumu uma vaivaa e ono i vai. A uma lea, ona asu lea o le ipu muamua i le pule o le tausamaaga. Ona asu ai lea o le ipu a le pule o le tausamaaga ma ua maofa o ia i lenei mea uiga ese ua tupu, ua liu uaina le vai. Ua taufaiifo uma foi tagata sa i ai i lena aso i le vavega lenei ua faia e Iesu. Ona toe fa’auau ai lea o le tausamaaga ma ua fialia tagata uma.

Ioe tamaiti, a i ai Iesu e leai se mea tatou te popole ai. A ala i le taeao, fai le tatalo ma ta’u ia Iesu mea uma e te manao ai, ona leai lava lea o se mea e te popole ai.

GALUEGA FAATINO:

1. Tapena e lau susuga i le faiaoga se faatinoga pupuu mo le fanau, i le vaega lea na liu uaina ai le vai.
2. Valivaliga ata: Fai kopi o ata ua saunia e galulue ai tamaiti.

PESE:

O le vavega
I Kana i Kalilaia
Liliu le vai e avea ma uaina
O le faailoga
O le mamalu o Iesu
Ua ofo ai tagata sa tumutumu


A'OA'OGA:

1. E mafai e Iesu mea uma.
2. Aua tatou te popole aua e i ai Iesu i mea uma.

TATALO: Ia saunia se tatalo e faauma ai le mataupu.

ATA: UA LILIUINA E IESU LE VAIE AVEA MA UAINA





ASO SA: 24 NOVEMA 2019

MATAUPU: UA FAAMALŌLŌ E IESU LE TAMAITITI MA'I.

SINI: Ia a'oa'o tamaiti i le alofa o Iesu i tamaiti mama'i.

TUSI FAITAU: Ioane 4:46-51 (mo le faiaoga)
Ioane 4:50 (mo le vasega)

“Ona fetalai atu lea o Iesu ia te ia, “Alu ia oe, ua ola lou atalii.”

FESOASOANI MO FAIAOGA:

O le tasi alii mautofi ua i Kapanaumi, ua ma'i lona atalii. Ua faalogo o ia ua maliu mai Iesu i Iutaia i Kalilaia. Ona sau ai lea o lea tamā ua faatoga ia Iesu e maliu atu sei faamalolo i lona atalii ua toititi lava oti. Ua lē mapu lava le tauanau o lenei tamā ia Iesu. Ua fai atu, maliu ane ia manū e le'i oti o ia.

Ua faafofoga Iesu i le manao ma le aioi mai a lenei tamā, ona ia fetalai atu ai lea; alu ia ua ola lou atalii. Ua talia e lenei tagata le fetalaiga a Iesu, ua alu foi ma le fiafia. Ua fetaiai ma ana auauna i le ala; ua latou ta'u mai foi ia te ia ua malosi lona atalii. Ona fesili lea o le tama po o le ā le taimi na malosi ai. Ua latou tali mai o le itula e tasi na manuia ai lona atalii. Ua iloa e le tamā o le taimi tonu lava lea na fetalai mai ai Iesu ua ola si ona atalii; ona alu ai lea o ia ma le fiafia.

GALUEGA FAATINO:

Faatino le tala e faiaoga ae faaoga se tamaititi e avea ma tamaiti e malamalama ai foi.

PESE:

Iesu alofa i tamaiti
Tamaiti uma o le lalolagi
Mumu Samasama Uliuli Paepae
E alofa Iesu ia oe ma au

Jesus loves the little children
All the children of the world
Red Brown Yellow Black and white
They are precious in His sight
Jesus loves the little children of the world.

A'OA'OGA:

1. E alofa Iesu i tamaiti.
2. Iesu le fomai sili.
3. Ta'u ia Iesu o tatou ma'i.

TATALO: Saunia e lau susuga i le faiaoga se tatalo e faauma ai le mataupu.

ATA: FAAMALOLO E IESU LE ATALII O LE TAMALOA MAUTOFI



MANATU TAIALA O TESEMA: E FESOASOANI LE ATUA I ONA TAGATA

ASO SA: 01 TESEMA 2019

O Mataupu ua saunia mo lenei masina o loo mafuli lava le faamamafa i le fesoasoani sili na saunia e le Atua mo le lalolagi. O le vaitau nei o le Kerisimasi o le vaitau na soifua mai ai lo tatou Alii Faaola o Iesu Keriso lo tatou fesoasoani sili. O loo i ai foi i le amataga o le masina nisi o tagata na aumai e le Atua ina ia avea ma fesoasoani mo nisi.

MATAUPU: UA FASIOTIA E TAVITA KORIATA

SINI: Ia a'oa'o le vasega ia malamalama o Tavita o se tama malosi, e faamoemoe i le Atua.

TUSI FAITAU: 1 Samuelu 17:41-51 (mo le faiaoga)
1 Samuelu 17:45 (mo le vasega)

“Ua e sau, ma le pelu ma le tao ma le tao leoleo; a o a'u, ou te alu atu ia te oe i le suafa o le Alii o `au, o le Atua o le itu taua a Isaraelu ua e faifai i ai.”

FESOASOANI MO FAIAOGA:

GALUEGA FAATINO:

Ua fa'afesāga'i le taua a Filisitia ma Isaraelu, ua faalatalata mai foi le toa o Filisitia o Koriata ia Tavita. Ua na iloa mai Tavita ona inoino ai lea o ia i le vaai mai i lenei tamaititi. Ua ia faapea mai foi, o a'u o se uli ua e sau ai ma lena to'oto'o? Ua ia tos fai mai foi ia Tavita, o le asō ou te foai atu ai lo'u tino i manu felelei ma manu tata'a.

Ua tali atu Tavita i le Filisitia po'o Koriata. Ua e sau ia te au ma le pelu ma le tao ma le tao leoleo, a'o au ou te alu atu ia te oe i le suafa o le Atua o Isaraelu ua e faifai i ai. O le aso nei, ua tuuina mai ai oe e le Alii i ou lima, ou te fasi ia te oe ma ave ese lou ulu. Ou te foai atu foi tino oti o au Filisitia i lenei aso i manu felelei ma manu tataa, ia iloa ai e le lalolagi uma, o i ai le Atua o Isaraelu.

A'o faia pea ia felafolafoaiga, ua amata ona faalatalata mai Koriata ia Tavita. Ona tago ai lea o Tavita i le ato ua ava'e le maa ma ua tuu i totonu o le ma'atā, ua sasau foi e Ia i le ma'atā ma ua lele atu le maa ua tau tonu lava i le muaulu o Koriata ma pau ifo ai i lalo ua oti.

GALUEGA FAATINO:

SOLO

Koriata o le toa malosi
Na faigofie ona oti
Soo se tagata faamauuluga
O lena foi lona iuga
Tavita na au na ke Atua

Manuia ai lou soifua

PESE:

Alofa Iesu ia i tatou uma

Tatou uma x2

Alofa Iesu ia i tatou uma

Alofa ia i tatou uma

Alofa i lou tama

Alofa i lou tina

Alofa i lou uso tuagane laititi

Alofa ia te oe alofa ia te au

Alofa ia i tatou uma.

A'OA'OGA:

1. Ia tumau pea i le Atua.
2. O le Atua lo tatou faamoemoe.

TATALO:

Faaiu i le tatalo ua saunia e lau susuga i le faiaoga.

ATA: UA FASIOTIA E TAVITA KORIATA



ASO SA: 08 TESEMA 2019

MATAUPU: VAAIGA I LEOLEO MAMOE

SINI: Ia a’oa’o tamaiti ia latou iloa le faaaliga na iloa e leoleo mamoe.

TUSI FAITAU: Luka 2:1-20 (mo le faiaoga)
Luka 2: 10 (mo le vasega)

“Ona fai mai lea o le agelu ia te i latou, “Aua tou te matatau; aua faauta, ou te au mai ia te outou le tala lelei o le olioli tele e oo mai i le nuu uma;”

FESOASOANI MO FAIAOGA:

O le mataupu o loo faamatala ai le faaaliga na vaaia e leoleo mamoe, ma a latou faaiuga na fai. O leoleo mamoe o tagata e nonofo ma aumau i le vao mo le vaaia o a latou lafu mamoe. Ae na faafuase’i ona latou vaaia se malamalama uiga ese na matua fefefe ai lava. Ua taufai faapoululu le tagata ia i le popole ma le fefe. Na faalogoina loa le leo ua faapea mai. “Aua tou te matatau, ou te avatu ia te outou le Tala lelei tou te olioli ai. Na ta’u mai loa le Tala lelei e olioli ai fegenoi solo loa le au leoleo mamoe. E lei uma atu le leo lena, ae toe sau foi le isi leo ua faapea mai; “o le aso nei ua fanau ai ia te outou le aai o Tavita le Faaola, o Ia o le Keriso le Alii. O le faailoga foi lenei tou te iloa ai le tama meamea o loo aui i le ie o loo taoto i le fale o manu.”

Ua amata ona toamalie leoleo mamoe aua ua manino le faaaliga na pupula tele mai ia i latou. Ua latou vaaia foi agelu e tele mai i le lagi ua vivii i le Atua ua faapea, “o le viiga i le Atua i mea aupito aluga, o le manuia i le lalolagi i tagata, ua alofaina e ia.

Ua o agelu i le lagi, ona talanoa ai lea o leoleo mamoe ua tatau ona o i Peteleema sei vaavaai i lenei mea ua faailoa mai.

Ua faatalise atu leoleo mamoe ma ua latou vaaia ai Maria ma le pepe o loo aui i le ie i totonu o le fale o manu. Ua ofo i latou ua latou ifo atu i le pepe ona toe foi ai lea ma le ofo tele o latou loto.

GALUEGA FAATINO:

Lau susuga, ua fautuaina ia faatino e tamaiti le mataupu o le faaaliga na iloa e leoleo mamoe, aua o le mataupu foi mo le Kerisimasi.

Tapena lelei e lau susuga le faatinoga e fai ma galuega faatino.

UIGA O UPU:

Faapoululu - saofai ma piilima pei e maalili

Malamalama uiga ese - pupula malosi o le fetu

Olioli - fiafia
Fegeno a'i - lilo lilo leisi leisi ma luelue le ulu ma mata
Tama meamea - pepe fou

PESE:

Kerisimasi fiafia
Kerisimasi manuia
Kerisimasi lenei ua tatou aulia

Leoleo mamoe
Sa malolo
Ae faateia i le fetu i le po
O le faaaliga ua pupula tele mai
Tulai leoleo mamoe
Saili ma talisapai

A'OA'OGA:

1. O Iesu le Faaola.
2. Tatou sauni mo le pepe o le Kerisimasi.

TATALO:

Sauni pea e lau susuga se tatalo e faauma ai le Mataupu.



ASO SA: 15 TESEMA 2019

MATAUPU: UA AAMI MAKOI E HEROTA

SINI: Ia a'oa'o tamaiti ia malamalama i le mafuaaga na aami ai e Herota Makoi.

TUSI FAITAU: Mataio 2:7-14 (mo le faiaoga)
Mataio 2:13 (mo le vasega)

FESOASOANI MO LE FAIAOGA:

Ia su'esu'e i lenei mataupu ona faamatala lea i tamaiti le togafiti leaga na faia e Herota e faalata ai makoi. Ina ua tau'a mai ua fanau le Tupu o tagata Iutaia, o upu faalata a Herota i makoi fai mai, "a tou maua le mea o fanau ai le pepe logo mai, o au foi out e fia ifo iai. Peitai e lei tuulafoai e agelu sa taitaia makoi, ua sauinia ai le isi ala e toe foi atu ai i lo latou nuu. Ina ua uma ona feiloai talai foi a latou meaalofa ma ifo atu iai i le pepe.

Ua faaali foi le agelu ia Iosefa ina ia tulai ave le tamaititi ma lona tina aua o loo saili Herota e fasioti i le tamaititi. Ona tulai loa lea o Iosefa ma Maria ma le pepe ua sosola i Aikupito ma nonofo ai. Ua fiu Herota e toe faatali makoi ona tonu ai lea i lona manatu ua olegia o ia e makoi. Ona fai ai lea o lana faatonuga ia fasiotia tama tane uma i Aikupito e afua mai i e lua tausaga ma pito ane iai. Ua mavae malie ia mea ona faaali mai lea o le agelu ia Iosefa i le miti, ua oti Herota.

GALUEGA FAATINO:

Faatino e faiaoga le Tala mo le fanau, ma ia taumafai e faaoga teuga e matagofie atili ai le mataupu.

PESE:

Ha! Ha! Ha! Le tala fiafia

1. Tatou o ua tatou manuia
Nasareta lo ta nuu moni
Ta te mitamita ai ma olioli
Aua o lo tatou tofi
2. Ua taunuu manuia le malaga
O Iosefa, Maria ma le tama
I le nuu lea o Aikupito
Ia faasaoina ai le Keriso

A'OA'OGA:

1. Aua le lotoleaga.
2. Aua le fiasili.
3. E manumalo lava le Alii.

MANUIA LE KIRISIMASI MA LE TAUSAGA FOU

ATA: MAKOIE TOATOLU

